

سرى للغاية

محضر اجتماع اللجنة التنفيذية العليا للاتحاد الاشتراكي العربي

قصر القبة، القاهرة فى ١٣ يونيه ١٩٦٥

سعت ١٩٤٥ الى سعت ٢٢٥٠

الحاضرون

الرئيس جمال عبد الناصر، زكريا محى
الدين، حسين الشافعى.. نائب رئيس
الجمهورية، على صبرى.. رئيس الوزراء،
نور الدين طراف، كمال رفعت، عبد
المحسن أبو النور، عبد المنعم القيسونى،
حسن إبراهيم، عزيز صدقى.. وزير
الصناعة، مصطفى خليل.

القرارات

بحثت اللجنة التنفيذية العليا للاتحاد الاشتراكي الاقتراحات الخاصة بميزانية ٦٥/٦٦ ودرست موضوع الإِدخار، وقد تقرر الاكتفاء بأن يكون نصف يوم فقط وهذا يجمع حصيلة قدرها ٧ ملايين جنيه وذلك بدلا من فرض ضرائب جديدة. وسيخصص لكل مدخر دفتر إدخار يمكن السحب منه وتحتسب الفائدة على أساس ٥٪ وهذه العملية تعتبر تأميناً اجتماعياً وسيقوم السيد على صبرى رئيس الوزراء بشرح هذا الموضوع عند اجتماعه بأعضاء الهيئة البرلمانية وسوف تقوم الحكومة بعرض مشروع القانون الخاص بإدخار نصف يوم على مجلس الأمة.

واللجنة التنفيذية العليا تقدر كل التقدير المبادرة التى أظهرها العمال بالعمل ساعة إضافية بدون أجر، وترى اللجنة أن هذا الموضوع مسألة اختيارية للعمال. وقررت اللجنة أن يكون ذلك لمدة شهر واخذ فقط مع الالتزام بأن تكون ساعات العمل ٧ ساعات تنفيذا للقرارات الاشتراكية التى صدرت عام ١٩٦١.

كما قررت اللجنة صرف الأجر الإضافى لجميع العمال الذين يعملون ساعات إضافية. وقررت اللجنة أيضا عدم خصم أى نسبة من أرباح العمال والموظفين وذلك محافظة على المكاسب الاشتراكية التى صدرت بقوانين سنة ١٩٦١.

وقررت اللجنة كذلك تخفيض ٢٥٪ من بدل التمثيل.

وقرر الرئيس جمال عبد الناصر رفع المكافأة الخاصة بموظفى الحكومة وعمالها من

١٢ يوما الى ١٥ يوما وستصرف فى أول يوليو القادم.

سرى للغاية

محضر اجتماع اللجنة التنفيذية العليا للاتحاد الاشتراكي العربي

قصر القبة، القاهرة في ١٣ يونيو ١٩٦٥

سعت ١٩٤٥ الى سعت ٢٢٥٠

عبد الناصر: الموضوع الأول اللي عاوزين نتكلم فيه هو موضوع ميثاق العمل، الحقيقة يعني مش مطمئن أنا لردود الفعل الموجودة وفي رأيي بالنسبة لعملية العمال والفلاحين، إنهم كقواعد أساسية لنا مايصحش إن احنا نعمل فيها خلطة بأى شكل من الأشكال.

فالعلمية مااتعملتش كويس أبدا.. العملية اتعملت بطريقة سيئة وكان لها رد فعل سئ. يعني فيه شيوعيين مثلا موجودين في العمال أنا ما بيهمونيش، لكن إذا غلطنا على طول يصطادونا فيه عناصر معادية موجودة يعني إذا غلطنا بيصطادونا على طول.

وفي رأيي أنهم اصطادونا في العملية دي؛ على أساس إن احنا بنتراجع في المكاسب الاشتراكية الموجودة! وأنا جاء لي عدد كبير جدا من الجوابات، وبعدين طبعا بحثت في الموضوع؛ يعني الوضع العمالي كان ثابت النهارده في رأيي إنه مش ثابت حصل لخبطة! والعملية ما اتعملتش بطريقة سليمة؛ بالذات في موضوع الـ ٨ ساعات يمكن أكثر من موضوع الإدخار، يعني موضوع الإدخار فيه ناس بتؤيد وفيه ناس بتعارض وبالذات اللي بيعارضوا هم أصحاب الدخل القليل.

يعني موضوع الـ ٨ ساعات هو عمل لخبطة لأن باين إنه احنا أخذنا خطوة بـ ٧ ساعات والـ ٨ ساعات بعدين فيه ناس كانوا بيشتغلوا ساعة ثامنة بأوفرتيم بيبقى بان أنه نقص ١٤,٥٪ لأنه بيشتغل الساعة الثامنة مجانا. وبعدين فيه ناس بيقولوا: طيب إحنا حاندخ يوم وحادى الدولة ٤,٥ يوم اللي هي بالنسبة للساعة ماعرفش يعني إيه رأيكم الصورة اللي عندكم شكلها إيه؟

صدقى: هو إذا سمحت سيادتك موضوع الساعة ده كان أثير في مجلس الوزراء، وأنا قلت هذا الكلام لأنى بارفض أولا إن احنا ما بنرجعش في قرارات اشتراكية اللي صدرت. تانى نقطة إنه حتى من ناحية تطبيق الـ ٨ ساعات بيخلق إشكال لإن احنا لما طبقنا السبع ساعات كان على أساس إن احنا بنملا الفراغ اللي يحدث نتيجة لإنقاص عدد ساعات العمل الى سبع ساعات لعمال إضافيين.

فالنهارده لما آجى أقول إن العمال يشتغلوا تمان ساعات بدل سبع ساعات، طيب العمال الاضافيين حأوديهم فين؟! فكان لازم العملية أيضا من هذه الناحية تكون مدروسة، إلا إذا أمكننا إن احنا نشغل إضافي.. يعني ساعات إضافية للمصنع نفسه، فإذا مصانع

سرى للغاية

الحديد الأكبر منها بيشتغل ٢٤ ساعة فى اليوم حانشغل مصانع الغزل كلها، يبقى هنا على طول يوميا يبقى فيه عدد من العمال إضافى موجود فى المصانع.

عبد الناصر: طيب نطبق إزاي الكلام دا؟!

صدقى: أنا اعترضت على هذا الكلام!

عبد الناصر: لأ.. طبق من أول الشهر فى بعض مصانع، أنا عندى تقارير فيه مصانع طبقت العملية دى من أول الشهر!

صدقى: هو فى الحقيقة يافندم العملية دى كلها فيه أكثر من عملية مشيت، وأنا مش عارف مشيت إزاي؟

الشافعى:تحصيل حاصل!

صدقى: موضوع الساعات دى هى مشى فعلا أنا شايف إن تطبيقه عمليا حايفخلق لنا مشاكل كتيرة جدا، ولذلك أنا إعتضت على مجلس الوزراء. كويس إتحاد العمال أعطى ال option ده العرض هذا فأحنا لما يبجوا عمال مصنع ما عايزين نشغله ساعة إضافية والعمال قالوا مش عايزين ناخذ عنها أجر؛ دى حاجة خاصة بيهم، وإحنا ما نقدرش نطلع قرارات من الدولة نرجع بها عن قرارات تشغيل سبع ساعات بدلا من ٨ ساعات. فيه إشكال تانى برضه أحب أثيره هنا.. موضوع مجالس الانتاج، يعنى إحنا برضه مشينا فى مجالس الانتاج وأنا شايف إن احنا لسه ما حليناش الإشكال ده.

عبد الناصر: معلش خلى موضوع مجالس الانتاج حا أتكلم فيه.

صدقى: لكن موضوع محتاج ال ٨ ساعات وال ٧ ساعات يافندم أنا شايف إن مافيش مصلحة.

عبد الناصر: هل طبقتوا انتوا ال ٨ ساعات؟

سرى للغاية

صدقى: أنا شخصيا ماعنديش خبر بحاجة، إنما فيه بعض شركات أخذت قرار بالتمتات ساعات
يعنى اجتمع..

الشافعى: لما رحى كفر الدوار فعلا قالوا: إنهم أخذوا قرار بالنسبة للتمان ساعات وبالنسبة للأرباح
بالنسبة لليوم.

عبد الناصر: ده النقابة فعلا يعنى هى أصلها من تأخذ قرار بدون مناقشات وبدون بحث، وبدون الرجوع
فى أى قرار طبقته إلا واجتمع الاتحاد العام لنقابات العمال فى الأخذ بهذا الشكل يعنى مثلا
أحمد فهيم جاى لى مئات الخطابات يسقط أحمد فهيم الخائن اللى.. اللى.. اللى بياخذ
ماهية كذا! ماكنتش أعرف ماهيته إلا والله بالجوابات.. بياخذ ٤٥٠٠ باين والا ٣٥٠٠!
أحمد فهيم كوكيل مجلس أمة.

طراف: مفروض إنه عضو مجلس أمة بياخذ زى أى نائب ماعرفش إذا كان..

عبد الناصر: لا.. لأ.. بياخذ فى الجوابات بيقولوا لى إنه بياخذ أنا ما كنتش أعرف العمال أصلهم أصحى
من الوزراء! (ضحك) يعنى صحيح بيقولوا أنه بياخذ باين ٣٥٠٠ يعنى.

صدقى: لأنه عايز يبقى وزير فيه كلام كثير عليه.

عبد الناصر: بيقولوا لأ.. بيقولوا يأخذ ثلاث.. أكثر حتى من بياخذ سيد مرعى بياخذ كام؟

طراف: بياخذ إذا كان كده يبقى من كرافت.

عبد الناصر: لأ بياخذ، ماهو هو فى الاثنين بيبقى جامع أكثر من ٥ آلاف جنيه؛ لأنه بياخذ من البنك
ولكن أحمد فهيم بياخذ باين ٣٠٠٠!

محي الدين: بياخذ من اتحاد العمال من...

عبد الناصر: لأ.. من مجلس الأمة وكيل مجلس الأمة له مرتب، وأنا شفت إنه بياخذ ٣٥٠٠ حسب
الكلام ده، وأنا ماسألتنش هه؟

سرى للغاية

بدوى: المفروض له مرتب خاص غير مرتبات الأعضاء.

عبد الناصر: يعنى ده الكلام اللى جه بيقول لك أحمد فهيم بياخد ٣٥٠٠ وبيأخذ مش فاهم إيه وبيعمل إيه، ونازلين شتيمه فى الرجل يعنى "يسقط أحمد فهيم"!

الشافعى: إنما والله الروح بتاع الناس يعنى فى اجتماع كفر الدوار كانت يعنى ماهياش خطيرة، يمكن فى المحلة يمكن.

صبرى: المحلة كان فيها مشكلة.

الشافعى: يعنى فى كفر الدوار كلهم مؤمنين ...

عبد الناصر: كل العمال؟

الشافعى: يعنى الناس اللى كانوا موجودين فى الاجتماع اتكلموا كلهم فى نفس المعنى.

صبرى: الحنت اللى حصل فيها اجتماعات ما اتقالش شئ والحتت اللى ما حصلش فيها اجتماعات فوجئوا بالقرار هو اللى حصل فيها!

عبد الناصر: ده بالنسبة للإدخار ولا بالنسبة ...

... : بالنسبة لكل القرارات الخاصة بدستور العمل.

معى الدين: هو على السيد كان سبق فى كفر الدوار إتكلّم فى هذه النقطة بالذات، وقال: إن دى مسألة اختيارية.. كده هم اجتمعوا وقرروا!

عبد الناصر: هو أنا كنت طالب تقرير بالذات على كفر الدوار على المشاكل الموجودة فيها من الداخلية؛ موضوع التشغيل ساعة ثامنة زيادة.

(قرأ سيادته ما ورد فى التقرير على النحو التالى:)

سرى للغاية

"قررت إدارة الشركات بالاتفاق مع أعضاء اللجنة النقابية ورجال الاتحاد الاشتراكي، تشغيل العاملين ساعة ثامنة زيادة بدون أجر اعتبارا من ٦/١، وذلك تمشيا مع القرارات التي أعلنها الاتحاد العام لنقابات العمال.

وتنفذ ذلك فعلا غير أن العاملين بالشركة قابلوا ذلك بعدم ارتياح، وأخذوا يرددون بأن ذلك لا يتفق مع القرارات الاشتراكية في شئ ومعناه الانتقاص من المكاسب التي حققتها الثورة للعمال، وأنه كان يجب على الاتحاد العام لنقابات العمال الرجوع الى القاعدة العمالية قبل إعلان هذه القرارات.

ويرددون بأن السيد أحمد فهميم عبد المعطى - رئيس الاتحاد العام - يقصد من وراء هذه القرارات التقرب من المسؤولين على حساب القاعدة العمالية هذا ويشكو موظفو الشركة وعددهم حوالى ٤٠٠ بأنهم كانوا يعملون مقابل ستة ساعات ونصف، وعندما نفذ نظام التشغيل ٨ ساعات أصبحوا يعملون ١٥ ساعة بدون أجر.

بعدين هو النقطة كمان اللي اشتعلت ان لما نقول عايزين نشغل ساعة بدون أجر ماقالوش لمدة أد إيه يعنى لو قال ٣ شهور لو قال لسته أشهر لو قال لسنة؛ بيان إنه مش رجوع، ببيان انه لمقابلة ظرف خاص لكن ترك الموضوع برضه لأن فيه ناس من اللي كانوا بيقلوا إن العملية بهذا الشكل معناها إن احنا رجعنا عن السبع ساعات برضة العملية ماهياش مقابل شئ أبدأ معناها السحب.

(ثم استأنف السيد الرئيس ما يلي:)

"شركة مصر للغزل والنسيج الرفيع: قررت إدارة الشركة بالاتفاق مع أعضاء اللجنة النقابية ورجال الاتحاد الاشتراكي، تشغيل العاملين ساعة ثامنة زيادة بدون أجر اعتبارا من ٥/٣١، وتنفيذ ذلك فعلا. إلا أن معظم العمال أبدوا عدم رضائهم عن ذلك، وأخذوا يرددون بأن ذلك لا يتفق والقرارات الاشتراكية وأنه كان يجب أخذ رأى القاعدة العمالية قبل اتخاذ أى قرار فى هذا الشأن".

أنا كنت طالب بالذات تقرير من ثلاثة أيام عن كفر الدوار؛ على أساس إن فيه نشاط هناك شيوعى أو شئ من هذا القبيل، فمش باين نشاط شيوعى باين ان فيه العمليات الموجودة اللي هى موضوع تقييم الوظائف وبعدين موضوع تشغيل الساعة الثامنة، وبعدين الخلافات بين الأعضاء ومجلس الإدارة وتمييز أعضاء مجلس الإدارة فى التقييم إدوهم درجة زيادة!

فهو برضه لما حسين الشافعى حايروح الاجتماع حايقفوا يصفقوا ويهللوا وبتاع ولكن ماعمروش أى اجتماع بالشكل ده يدى الصورة الحقيقية. طبعا كون لجنة الاتحاد

سرى للغاية

الاشتراكى اشتركت فى القرارات مش ممكن حاتدى صورة ان العمال غير راضين عن القرار
اللى هم خدوه؛ بدليل إن ماجاليش حاجة من الاتحاد الاشتراكى عن هذا الموضوع!

أساسا الموضوع ابتداءً بجوابات وبعد ما جاءت لى الجوابات ابتدأت أسأل وأشوف؛
فوجدت إن العملية عيبها الأساسى بتعمل هزة فى وسط العمال! وأنا فى رأى بالنسبة
لموضوع العمال بالذات وموضوع الفلاحين هم ركائزنا الأساسية ويجب إن احنا مانعملش
فيهم أى هزة لأن بأبقى بعد كل اللى أخذوه ده، بندى نوع من الفرصة للعمل لأعدادنا، وفيه
شيوعيين موجودين وفيه ناس موجودين مستعدين يصطادوا.

صدقى: وبالنسبة لزيادة ساعات العمل يافندم، فيه بعض شركات بتشتغل إضافى بصفة
مستديمة.

عبد الناصر: بتدى إضافى.. آه.

صدقى: فى بعض الفئات لأن فيه نابغة فيهم، فالنهارده لما آجى أقول له: لأ.. ده أنا الساعة
الإضافية اللى بتكلف عمل بأدفع لك عنها ١٤٪ زيادة؛ حايشتغلها يبص يلاقى إن أنا
نقصت أجره وده الحقيقة صعب!

عبد الناصر: ما هم باعنين نفسهم بيقلوا نقص ١٤٪!

صدقى: إنما لما أقول: إذا كان بس هو اشتغل ساعة زيادة لكن أجره لم ينقص؛ يبقى مخففة لكن
ده فيه واحد أجره حاينقص؛ ودى تبقى الحقيقة مؤلمة.

عبد الناصر: طبعا فيه ناس مؤيدين يعنى مش باقول ان الناس مش مؤيدين، وفيه ناس معترضين بالنسبة
للإدخار مثلا فيه ناس بتقترح يبقى فيه رسوم على السلع الاستهلاكية - ودول بيعتبروا من
الطبقة المتقفة - أو يعنى الاعتماد على شهادات الاستثمار، فيه ناس بيقلوا: إنه يترك
الإدخار لحرية الأفراد.

...: عايزين نعمل له حد أدنى.

سرى للغاية

عبد الناصر: أمناء لجنة الاتحاد الاشتراكى العربى باعتين زيادة العمل و ١٠٪ من الأجور الاضافية مؤتمر الفلاحين المنعقد بمركز المنزلة؛ تأييد سياسة الإدخار. الحقيقة فى كل الحاجات دى الواحد بياخد الحاجات دى بتحفظ! لأن متهيألى واحد بيكون واعى ويعمل بعدين فيه ناس بيؤيدوا خصم من الإدخار استجابة للدواعى الوطنية وكذا، ولكن برضه عمال شركة كذا كذا بالبرقيات إنهم قاموا بالعملية وبعدين يعارض كثير من العاملين وخاصة محدودى الدخل خصم يوم من مرتباتهم للإدخار، خاصة وأنه قطعت سلف البنوك ونظام البيع بالتقسيط والأوكازيونات.

والرسائل.. يعنى المرتبات الضئيلة والأعباء المتزايدة والأسعار فى ارتفاع، وبتوع الحكومة بيقولوا: عمال الشركات أخذوا امتيازات وإحنا مأخذناش، ولهم نصيب فى الأرباح وإحنا مالناش!

وبعدين العمال بيقولوا طبعاً مجلس الأمة ورجال الجيش وكبار الموظفين وافقوا على خصم يوم؛ لأن مرتباتهم كبيرة وبعدين برضه النقطة الثانية: القرارات الخاصة بحصول العمال على نصيب فى الأرباح والعمل سبع ساعات، واليوم يسحب ذلك تدريجياً! وبعدين برضه لا يمكن المساواة بين عامل يتقاضى مرتباً محدوداً وليس لديه أعباء وعامل آخر يحصل على نفس المرتب ولديه أعباء! واستتكار لما جاء على لسان أعضاء الاتحاد العام للعمال، وأى تأييد لما جاء من قبل رجال الاتحاد الاشتراكى وأعضاء النقابات أو أعضاء مجالس الإدارة، وأن هذه القرارات قد صدرت من حفنة من متعددى الدخل المتخمة جيوبهم بدخول غير مشروعة!

يعنى ده ملخص جوابات العمال يخصم منهم فعلاً ٩٪ إدخار ويطالبون بخصم. وبعدين فيه ناس قالوا إن إحنا كنا بنخصم ٥٪ ووصلت دلوقتى ٩٪ وبدال ١٪ بطالة يبقى ١٠٪

بعدين العمل ساعة يومياً معناها عمل خمسة أيام إلا ربح فى الشهر، بالإضافة الى يوم الإدخار؛ يصبح ما يسهم به العامل ستة أيام الى جانب ٩٪ إدخار وبعدين أبواق الدعاية تستخدم فى إعلان الموافقة على خصم يوم إدخار، وإن ده كلام مش فاهم إيه واللى باين ان نظام الإدخار عملية مفروضة وهى عملية تنقيص ماهيات هى دى عملية دخله يعنى لم يفهم على إنه إدخار أو تأمين اجتماعى وكده ولكن كل العملية مفهوما على أنها..

.... خصم.

سرى للغاية

عبد الناصر: إخبار بعدين رفعت اشتراكات التأمين من ٥٪ الى ٧٪ الى ١٪ بطالة و ١٪ تأمين صحى!
وبعدين طبعاً بيتكلموا عن اليمن ويقولوا: إن العملية دي عملية اليمن وهى اللي واخدة فلوسنا
وبتاع! وبرضه ناس ببيعتوا ويقولوا: نلغى الضيافات، والناس اللي ببيجوا يزورونا دول
مافيش داعى ليهم وبرضه يعنى ندخر فلوسنا علشان نصرفها على الضيافات؟! وفيه عمال
باعتين بيكذبوا الاعلانات اللي طلعت فى الجرائد باسمهم، وبتقول إنهم وافقوا على الحاجات
دى!

وبعدين فيه ناس بتقول: ندخر مبالغ المنح السنوية، وبعدين ناس بيقولوا عدم
الخصم من ذوى الدخول الصغيرة. وبعدين فيه كلام ان العمال كانوا يتقاضون أجورهم ٣٠
يوم والآن تحسب على ٢٦ يوم، فكيف يخصم بعد ذلك ويثبت حضورهم على ٢٥ يوم؟!
والأجور ضئيلة والأولاد والمعيشة والكلام ده!

صبرى: ده مش حقيقى!

صدقى: دى مش حقيقى همه كانوا بياخدوا على ٢٦!

عبد الناصر: كانوا بياخدوا آه على ٢٦ يوم، وبعدين الثورة تقرر للعامل سبع ساعات ثم ترجع فى قرارها!
هل يمكن أن يتساوى عامل سن كذا ويتقاضى ٢٥.. يعنى إيه؟! علما فى كل الكلام ده فيه
تأييد للثورة بالكامل.. الخ ولكن برضه محطوط أرباح العمال ثم سحبها!
وبعدين.. واللى بيقول: إن عندى أولاد كثير واللى يعنى الأيام حددت دخله!
وبعدين تجيبينى اقتراحات أعضاء مجلس الأمة! (ضحك) دى مجموعة فى الحقيقة بتبين
الصورة، وفى رأى يعنى إحنا ماشيين فى العملية، إذا كنا بنقول هانقابل سنة صعبة وإذا
كنا بنقول مش فاهم إيه.. وإذا كنا بنقول كذا بيهمنا أساسا أن بتكون عندنا القاعدة وطيدة
يعنى وخصوصا بالذات قاعدة العمال.

بعدين فيه وعى كبير قوى عند الناس يعنى إحنا يمكن القيادات عندنا ما فيهاش
وعى لكن بالنسبة للقواعد، الناس فاهمة وصاحية، وفى رأى لازم نشوف حل لهذا
الموضوع.

بعدين فيه نقطة برضه طبعاً بدى أقولها: الناس فاهمة ان الحكومة بتلف عليهم
يعنى بتضحك عليهم يعنى على أساس ان العملية ما إتعملتش كويس، يعنى إتقال مش
حانعمل ضرائب مش كده؟ ولكن الحكومة جايه تلف عليهم وحانتقص الأجور! متهيألى دى
بتسبب على طول عامل نفسى وفى تصورى إن احنا لو بناخد الوضع مواجهة، ويجب إن

سرى للغاية

احنا ما نديش الناس هذا الشعور، علما بان أنا وافقت على موضوع الإدخار من أول ماحصل الاقتراح به ولكن إخراج العملية إتعمل وحش جدا! بحيث إن احنا بنخفض الماهيات! يعنى ماعرفش إنتوا حاسين بالكلام ده ولا مش حاسين.. ماعرفش!

صبرى: الحقيقة العمال طبعا.. هو الأساس طلع من اتحاد العمال هو الغلطة الأساسية، مع إن برنامج العمل بالنسبة لهم كان مختلف عن القرار، إنما أخذوها ببساطة. وبعدين أخذوا القرار بدون ما يرجعوا للقواعد إنما أى فكرة حصل فيها اجتماع فيما يختص بيوم الإدخار بالذات مش الـ ٨ ساعات.. الـ ٨ ساعات أنا كنت معارض فى رجوعه، وأنا قلت الكلام ده فى مجلس الوزراء إنما يوم الإدخار بالذات لما قعدوا مع القواعد المشتركة، وخصوصا إن مافيش حد مرتبه حايينزل عن النهارده بالعكس حاييزيد عن النهارده. أنا عندى بيان بالفئات المختلفة اليوم يساوى كام يعنى إدخار يوم يساوى كام، والعلاوة الدورية تساوى كام.

عبد الناصر: ماإتقالش ده فى الاجتماعات!

صبرى: ماإتقالش.. اللى اتقال فى الاجتماعات راح على السيد ولفوا فيها اللى اتقال فيها هذا الكلام، وبالتالي اقتنعوا. تانى حاجة.. إنه اللى ما حصلش فيها اجتماعات، وهم اللى فوجئوا بقرار الاتحاد فيه فنتين الحقيقة؛ فيه فئة اللى كانت مستعدة وبعدين قرار الاتحاد ده اعتبروه إنه show، وكانوا عايزين ياخدوا هذا القرار، وفيه طبعا اللى مش فاهمين؛ فبقت اللى مؤيدين والمعارضين الاتنين ضد الاتحاد. فالعملية أضعفها الإخراج بتاعها، لكن المجهود الذى بذل بعد كده من النقابات المختلفة جاب نتائج خصوصا فى الحنت اللى هى فيها اجتماعات، واتفهم فيها الفرق بين أى إنزال عن المرتب الحالى، بالعكس فيه زيادات ماعدا يمكن بعض فئات المرتبات الوسطى.

فيما يختص بموضوع الضرائب، الحقيقة يعنى نخش فى ضرائب والا فى إدخار؟ يعنى هو طبعا كان أسهل حاجة بنقدر نخش فى الضرائب، لكن موضوع الإدخار يمكن له أهداف أكثر من الضرائب. بالنسبة للضرائب، كل واحد بيدفع ضريبة أو الرسم ومايبحسش بيها بعد كده تخصم منه فى الإدخار، وخصوصا فى النظام اللى احنا مقترحينه؛ إن كل واحد يبقى معاه دفتر زى دفتر البريد، يبقى حسابه حايكبر ويسحب عليه بعد فترة. وبعدين إذا طلع على المعاش فيضاعف بمبلغ إضافى العملية لما حايشوفوها بإيدهم أحسن كثير من عملية الرسوم؛ لأن الرسم رايح عليه رايح عليه فى النهاية!

سرى للغاية

طراف: مش مفهومة.. ماحدش فاهم الصورة فاهمين إنه خصم!

عبد الناصر: ماحدش فاهم.. يعنى الصورة للعملية فى البلد إنها خصم.. تقليل المرتبات. يعنى هل النهارده عملية الإدخار إن الواحد حايدخر زى مايبدخر فى البنك ويسحب مثلا؟! هل واضحة للناس؟!!

رفعت: مش واضحة!

طراف: مش فاهمين!

أبو النور: والفلاحين بتوع الاصلاح؟

صبرى: الهدف الثانى من عملية الإدخار أو ميزتها عن عملية الرسوم، إن نقدر نحط خطة عمل أو خطة إدارية تمشى مع خطة الخمس سنوات، فيما يختص بالرسوم إحنا محكومين فى الواقع بالظروف المؤقتة. يعنى نبيجى سنة بنقول نزود السجاير قرش سنة نزود قرشين حسب ظروف معينة فى حين إن عملية الإدخار بتبقى عملية منظمة متزايدة بزيادة العمالة باستمرار وبزيادة الأجور باستمرار، ماشية بالنسبة والتناسب؛ بحيث إن احنا نقدر نقول: إن إذا كنا عايزين نصل فى سنة ١٩٧٠ الى مدخرات تساوى ٢١٪ من الدخل القومى؛ وده هو السبيل الوحيد إن احنا نحقق... الثانية مافيش وسيلة تانية نقدر نعملها إلا بالإدخار المنظم. عملية الإدخار الحقيقة بتحل لنا مشكلة التنمية اللى حانواجها فى الخمس سنين؛ بالنسبة والتناسب مايبين الدخل القومى ومايبين الإدخار القومى.

فى عملية الرسوم أو الضرائب العملية بتبقى خاضعة لظروف، ثم إن برضه فى الرسوم مافيهاش عدالة - إذا كنا يعنى بنتكلم برضه من ناحية العدالة - يعنى أعباء بيتحملها الشخص؛ فى الرسم مثلا على السجاير بيفرض على كل واحد سواء كان دخله محدود أو دخله متوسط أو دخله عالى تقريبا نفس الرسم بيدفعه، مافيش واحد بيشرب أقل من الثانى، سواء كان دخله أقل أو كبير حيثشرب نفس الكمية تقريبا فى المتوسط. ففى الحقيقة يبقى العبء اللى بيتحملة محدودى الدخل فى الرسم اللى هو بيشكل الحقيقة حجم كبير.

سرى للغاية

إذا كنا عايزين نعمل رسم يجيب لنا حصيلة زى السجاير، الشاى .. إلخ من السلع التى تستهلك على نطاق واسع.

فى النهاية العدالة هنا ماهياش متوفرة من ناحية تحمل الأعباء، صحيح فى النهاية اللي بيدخر أكثر بياخد أكثر، لكن كل واحد بي فكر فى يومه يمكن أكثر مما بي فكر فى نهاية الخدمة بتاعته؛ فدى الميزة بتاعة الإدخار من الرسوم.

وكان فيه بعض اقتراحات جاءت برضه من العمال يمكن شوية إنهم بيقلوا: بدل ما بندخر يوم بنخصم نصف أو كل الأرباح أو بنجمد العلاوات. حتى ده مش فى مصلحتهم وده يدل على انهم مش فاهمين برضه الصورة بتاع الإدخار. خصم الأرباح أو حتى تجميد العلاوات - زى ما هو باين فى الأرقام - إنهم حايتحملوا عبء أكثر من إدخار يوم، والخصم هنا برضه بيروح عليهم الى الأبد مش حايجصل عليه، فى حين أن الإدخار بيحصل عليه بعد فترة من الزمن.

وبالنسبة حتى للموظفين، يعنى لو حسبنا.. إذا جمدنا العلاوات أو ما إديناش الأرباح هم الـ ١٢ يوم اللي بياخدوهم الموظفين فى نهاية السنة يشكلوا الـ ١٢ يوم الحقيقة يوم فى الشهر. معنى هذا إنه بي فقد ١٢ يوم وبيأخذ العلاوة الدورية؛ فمافيش خسارة عموماً مادية مبنية عن الوضع الحالى بالنسبة للموظفين أو بالنسبة للعاملين فى المؤسسات والشركات. فالحقيقة يعنى أنا رأيى برضه إن احنا حانواجه يمكن شوية معارضة، لكن بعد فترة من الزمن لما يفهموها بأفضلها عن الرسوم أو عن الضرائب، ولو أنه أسهل.

عبد الناصر: أنا رأيى ان الكلام اللي انت بتقوله صح إنه كلام theoretically، ولكن Politically

غلط! غلط نتيجة اللي حاصل ده وبعدين الوضع السياسى بيبقى مهزوز لأن الكلام اللي بيتقال ده يمكن فيه ناس هنا لأول مرة برضه بيسمعوه؛ بالنسبة لإزاي التوفير وإزاي حايسحبوا وإزاي حايعملوا.. إحنا خطينا خطوة Politically غلط!

ونحن قلنا: إن خصم يوم من مرتبات العمال حايبقى خسارة وده اللي اتعمل طبعا وده اللي بيسبب الميوعة فى وضع العمال، علما بإن احنا لما بنعمل ضريبة مثلا على السجاير.. أنا أتكلم على التأثير السياسى على إعطاء الفرصة للاستغلال!

وأنا لما وافقت على موضوع الإدخار وافقت على أساس إن حايتعمل منه cooperation للعملية، تمشى فى الطريق الصحيح. العملية طلعت surprise، وفى مجلس الأمة قرئ الموضوع، وأصبحت تانى يوم فى البلد خصم يوم، وماحد فهم حاجة وحتى لم تشترك وسائل الاعلام كلية فى توضيح الموضوع!

سرى للغاية

هو الراجل إذا كان حايفدر يسحب طيب يقدر يدخر ويسحب، يعنى يخصم منه يوم وبعد كده يقدر يسحبه زى اللى عنده دفتر توفير؟

القيسونى: بعد مدة معينة كذا سنة ٣ أو ٤ سنين.

عبد الناصر: هو العملية Politically مش ناجحة فى التطبيق علما بأن لو نعمل ضريبة على السجائر حاتجيب ٧,٥ مليون جنيه، وعملية الإدخار حاتجيب ١٤ مليون - ٧ مليون جنيه - وتمشى لا حد يتكلم. عملية مثلا ضريبة الدفاع لما عملناها ولما ضفناها بتجيب ١٢ مليون جنيه، والنهارده يمكن بتجيب أكثر بتجيب ١٤. ال repercussions السياسية بتاعتها ماعملتش ال raw اللى حاصل النهارده!

وبعدين هو اللى أساء للموضوع الحقيقة أكثر عملية الساعة التامنة هى اللى أساءت أكثر للموضوع؛ بينت إن احنا بنقلل الماهيات وبنسحب سبع ساعات أجر!

إبراهيم: هو الواقع إحنا بندى أعداءنا فرصة بالخطأ اللى حصل فى تطبيق الحاجات دى، والواقع إنه بالرغم إن حتى بعض الناس بتوافق على الكلام ده إلا أن الكلام المعارض له قبول فى نفوس الناس. فحتى اللى بيروح الاجتماع وبيوافق يمكن بيوافق عن اقتناع، ولكن لما بيخرج بيسمع كلام ضده عن سحب المكاسب بتاع الاشتراكية، بيرجع تانى يتأثر.. حتى الموافق بيرجع يتأثر وبيرجع يتكلم فى هذا الكلام نفسه، له قبول الكلام ضد..

عبد الناصر: يعنى إحنا مافيش كلام عندنا؟

إبراهيم: وإحنا ماعندناش كلام، هو جايز فيه يمكن حاجة كمان حصلت يعنى أرجو إن احنا نتلافها فى المستقبل؛ لأن عدم التنسيق وضعنا النهارده فى موقف حرج جدا. يعنى التنظيمات بتاعتنا لازم تتكلم مؤيدة لهذا والرجوع النهارده فيه حايفلى التنظيمات بتاعتنا دى تتكشف؛ كأنما تتكلم ضد العمال أو ضد القواعد الشعبية، وبيلاقوا نفسهم فى الهوا لا أحد بجانبهم!

عبد الناصر: لأ بدنا أولا نستعرض الوضع وبعدين نشوف we are not jumping to conclusions يعنى بنرجع ولا مابنرجعش ولكن قدامنا وضع ولا ماقدمناش!؟

سرى للغاية

إبراهيم: لأ.. هو قدامنا حتى اللي بيوافقوا لما بيطلع بره ويسمع كلام مضاد، اللي خده منه الشئ الفلانى بيجد قبول فى نفسه. وكل واحد بحسب على الدخلى اللي جاى له؛ اللي بياخده أد إيه وانه رتب حياته على كده. يعنى لما نقول له فى المستقبل؛ ما عندوش مانع إن هو العلاوة الجاية تتخصم.. أى حاجة ما بياخدهاش فعلا النهارده ما عندوش مانع انها تتخصم، لكن اللي بياخده بيعتبره صعب جدا إنه يتنازل عنه، بيقول لك: أنا رتبت نفسى على كده! دى صورة.

الشافعى: هو برضه فى التأمينات الاجتماعية، لما ابتدأت كان فيه لها معارضة ومعارضة كبيرة قوى، وكانت الناس دائما ميالة إنها تسحب مدخراتها فى مكافأة نهاية الخدمة. وكانت دائما بتجد تحبيذ لأن المكافأة تفضل دائما كمكافأة، بحيث إنها تقدر تسحب مبالغ متجمدة، وأخذت وقت طويل لحد ما أخيرا دلوقت كل واحد سحب مدخراته وسحب مكافأة نهاية الخدمة فى مرحلة من المراحل، حتى فى كفر الدوار فى الاجتماع الأخير كان فيه جزء سحب مدخرات كمكافأة نهاية الخدمة، كان بيطلب ويلح بأنه يعيد هذه المبالغ بعد ما استشعر فعلا الميزة اللي بياخدها فى حساب مدة خدمته اللي بيترتب عنها معاش.

وبرضه عملية الإدخار الحقيقية ما صاحبهاش تفسير كافي؛ لأنها عملية بتعود أولا وأخيرا بفائدة للشخص كإدخار فعلا وحتى كان مفهوم. - زى كلام الأخ حسن والأخ نور الدين - حتى فى الأمانة إمبراح وإحنا مجتمعين كان بيحصل الناس المجتمعين التصور اللي عندهم أنه ما هوش إدخار للشخص نفسه وإنه هو خصم.

عبد الناصر: وانت فسرت له؟

الشافعى: لأ.. طبعا فسرت.

طراف: فسر؛ لأن بالفعل أصل هى تصور إنها فائدة شخصية.

الشافعى: يعنى هو فيه فئات الحقيقة فى مجال التأمينات ما يطبقش عليها أى نوع من التأمينات؛ زى مثلا العمال فى الزراعة، خدم المنازل، المشتغلين فى منازلهم لحساب صاحب العمل ذوى المهن الحرة والمشتغلين لحسابهم وأصحاب الحرف، أصحاب الأعمال أنفسهم، ودى فئات الحقيقة أصبحت بعد ما أحست بأثر التأمينات كمعاشات.. أصبحت هى بتطالب النهارده بأن يبقى لها.

سرى للغاية

عبد الناصر: بس ده موضوع تان يا حسين، يعنى بدنا نحصر كلامنا فى الحالة اللي قدامنا مإحناش عايزين ندخل فى الكلام ده، يعنى حاسس إن فيه حالة عايزة علاج مش عايزين ندخل فى خدم المنازل!

الشافعى: لأ.. أصل يعنى تقدير حسابها أنها توفر ٣٣ مليون جنيه.

محي الدين: هو أنا عايز أقول: الموضوع بصراحة لأن أصبح ثقيل على النفس، ويمكن دى أول تجربة لنا فى موضوع بهذا الشكل، فأنا باقول يعنى مابأدافعش طبعاً عن نقابات العمال ولا حاجة، لكن يعنى عملية الاخراج بأى صورة من الصور يصح إنها تتحسن نسبياً، ولكن كانت برضه العملية خدت كلام كثير، يعنى حتى ولو افترضنا انها جاءت من تحت وبخطة وكده. الأجهزة اللي بتنفذ هذا الكلام أجهزة لسة مش مربوطة، يعنى إحنا عندنا تجارب حتى فى الاتحاد الاشتراكي؛ الأمناء وكده ما بيقولوا الشئ اللي احنا يعنى عايزينه يقولوه حتى بطريقة روتينية لا نقتنع. فلو تصورنا أن العملية جاءت عن طريق القواعد؛ يمكن كانت حاتقلت ولا يمكن أبدا الوصول الى القرارات التي وصلنا إليها حتى الآن.

أنا اللي شافه الصورة اللي عندي من المعلومات فى القاهرة ومن نواحي ثانية، أن موضوع اليوم تقريبا مشى؛ لأن لا يمكن إحنا نحصل على اجماع بالنسبة لأى موضوع بيتناقش، فالمقياس لنجاح هذا الموضوع هو الغالبية.. يعنى رأى غالبية الناس زى ما قال السيد الرئيس. أن أول مركز يصرح للهجوم على اليوم هو موضوع الـ ٨ ساعات؛ لأن حتى اللي موافق عن قناعة وهو متضرر ومقتنع بالفكرة، ولكن فى نفس الوقت يعنى يقول لك لأ.. الجنيه ده يستنى فى جيبى لآخر الشهر أحسن ماياخدوه منى، وده حايشكل عبء علينا وبتاع!

فحكاية الإدخار بيدى فرصة لأنه يقولوا دول سحبوا الامتيازات وسحبوا كذا، يعنى اللي عايز أوكد عليه أن موضوع اليوم يعنى تقريبا اللي أنا شافه إنه ماشى، لو إحنا عملنا إيضاح لموضوع الـ ٨ ساعات يمكن نقطع خط الرجعة على كل أحد بيهاجم الإدخار.

أنا شفت فيه قرارات يعنى اجتماعات - مش كل الشيوعيين - بعض الشيوعيين فى قراراتهم موافقين على اليوم بتاع الإدخار إنما بيهاجموا الـ ٨ ساعات فإذا أمكن إن احنا نصلح الجزء نقدر نحصل على الجزء الآخر.

سرى للغاية

خليل: لوسمحت سيادتك.. هو ربما اليوم الصعوبة اللي بتيجى أو عدم الرضى منه إنه بيمس دخل الشخص اللي مرتب حياته عليه، وعشان كده كان التقدم لمجلس الوزراء اقتراح مرادف؛ اللي هو أن الوفر يجى من العلاوة الدورية.

عبد الناصر: اللي هو إيه؟

خليل: الوفر اللي العامل يدفعه مايمسش الدخل بتاعه، ولكن كان ممكن إذا كان بياخد علاوة دورية والعلاوات زادت فى قانون الموظفين أو العمال، يعنى الواحد بيقارن إيرادات النهارده بدرجات القانون، أو المزايا اللي أخذوها العمال؛ يبقى ممكن الوفر يعنى بدل ما يبقى يوم، نأخذ جزء من العلاوة الدورية، ودى حاتيجى على المستقبل ويقدر هو يرتب حياته مستقبلا على إن بدل ماياخد علاوة.. كان مفترض مثلا أن الوفر يحدث فى ثلث العلاوة، أفكر يادكتور قيسونى أو حاجة زى كده أو نصف علاوة. دى لها ميزة طبعا - زى السيد رئيس الوزراء مابيقول - إن الوفر مابيستقطعش - يعنى يدفع رسم قد إيه العميل - لكن الوفر تأمين لمستقبله وفائدة له، إنما لما آخذه من العلاوة ميزته إن أنا ما بأمسش الوضع القائم، ومابأخفضش الدخل اللي هو رتب حياته عليه وده برضه الاقتراح ده جاء من ناس كثير من الخارج.

يعنى لما الواحد يتكلم مع الناس، قالوا له: طيب ليه ما تأخدوش من العلاوات يعنى بلاش التجميد؛ لأن التجميد أنا فى رأيى يبقى ضار لأن مانقدرش نرجع فى حكاية العلاوات أبدا. إنما ميزة العلاوة إن أنا باخفضها وبأخذ جزء منها إدخار، إن العبء السنوى فى زيادة أجور العمال بيقل وده برضه بينعكس على الانتاج؛ بأنه بيدى صورة أحسن، وبيستفيد العامل نفسه لأنه بياخذ فائدة إدخارية.

بالنسبة للـ ٨ ساعات أنا بأعتقد ان مافيهاش فائدة يعنى سواء من ناحية الانتاج أو انعكاس على أى وضع يعنى حايبقى سئ، وملهاش لزوم مطلقا.

أبو النور: هو إذا سمحت لى سيادتك، إن عشان الدعاية اللي اتعملت ضد هذا الموضوع على أنه هو خصم من المرتب، ممكن إن العملية تتعمل بين وضعين، يعنى بين العلاوة وبين اليوم بتاع المرتب؛ يعنى نتركها اختياري.. اختياري لكل شخص يختار بين نصف العلاوة وبين يوم فى الشهر يدخره.

سرى للغاية

لما نقول يختار يبقى بعدنا عن ناحية إن أنا بأخصم.. ناحية اجبارية، حتى من الناحية السيكلوجية بقى وضع هو يختار زى ما هو عايز يا نصف العلاوة يا يوم زى ما هو عايز، ثم نفهمه فعلا إن هو بياخذ زى صندوق البوستة تماما دفتر فيه حساب يقيد فيه، بعد فترة يقدر يستلف عليه، وبعد كده يقر يصفيه. وضع واضح بحيث يبقى فاهم فعلا انه إدخار بيحيله كل شهر ويقيد فى دفتره، على هذا الضوء بيان إن فيها الاختيار.

فيها دفتر فعلا مش خصم بيبقى فى جيبه باستمرار بيبقى فى وقت الزنقة يلجأ اليه وفى وقت مناسب يقدر يصفيه زى ما هو عايز بيق فى هذه الحالة أعدنا النقطة بتاع إن احنا بنخم اجبارى من الشخص فالدعوة أو الدعاى ضد هذا الموضوع بتتلاشى.

فى نفس الوقت النقطة بتاع الساعة اللى هى الساعة الثامنة، فى رأى أنها لا بد أن تنتهى، يعنى بنهيتها نهائيا، وخصوصا فعلا إن احنا سبق بحثناها قبل كده ووجدنا انه لا داعى لها.

القيسونى: هو تحقيق الإدخار عن طريق توفير جزء من العلاوة الموعد بتاعه فى أول يونيو، لكن أنا أعتقد أن نهاية الموعد ده دلوقتى، إن العلاوات بتيجى فى شهر مايو وبيبتدوا يقبضوا فى أول يونيه. فإحنا كنا برضه ناقشنا الموضوع ده، إننا نبيجى فى أول يونيه والعلوة مثلا اللى حاياخذ جنيه نقوم نعمل له ورقة مثلا بـ ٨٠ قرش اللى هى تساوى إدخار يوم مثلا. وكان ممكن تتحل ما يحسش بيها لأن ماهيته حاتزيد بجنيه وهو بياخذ الـ ٨٠ قرش، ولكن ما أمكنش عملها.. مالحناش فى الواقع العملية دي؛ لأن كان ابتداء مجلس الأمة يقرر إدخار يوم بالنسبة لمكافآت الأعضاء بتوعه، وكان اتحاد العمال لسه بيناقش المسألة، فمحابيناش إن فى الحكومة يعنى إننا نضغط نسرع فى العملية بحيث إنها تتم فى الوقت اللى ما يحسش بيه الناس بان الإدخار هو معناه تخفيض مرتباتهم.

دلوقتى أى إدخار لا بد إنه حايصحه تخفيض من الدخل اللى حصلوا عليه فى شهر يونيه، صحيح همه حصلوا عليه شهر واحد ولكن حايبقى فيه تخفيض من الدخل اللى حصل عليه هذا الشخص.

فى المناقشات بتاع الميزانية لجنة الميزانية فى مجلس الأمة يعنى، أنا لمست برضه - زى ما بيقول الأخ زكريا - إن فيه قبول لفكرة إدخار اليوم، وقبول عام للفكرة داخل اللجنة من ناس يعنى بيمثلوا اتجاهات مختلفة. ولكن على الرغم من القبول العام ده كان فيه برضه بعض اعتراضات من هنا ومن هناك، ويمكن أعطيك الاعتراضات فى اتجاهين:

الاتجاه الأول: أنهم بيقولوا: ولو إنهم موافقين على إدخار يوم ونجمع منه ١٥ مليون جنيه أو ١٤ مليون جنيه، إلا انهم بيقترحوا - بعض أعضاء - بيقترحوا إن يكون ده

سرى للغاية

متدرج؛ يعنى ناخذ أقل من يوم على الأجر الصغيرة ويوم عن الأجر المتوسطة، أكثر من يوم عن الأجر الكبيرة؛ بحيث إن الحكومة يعن ترتيبها، بحيث انها تصل برضه الـ ١٥ مليون جنيه، ويبقى فيها معنى أكبر من معانى الاشتراكية؛ بأن بنقرر ناخذ من الشخص الصغير نسبة أقل من اللى بناخذها من الشخص اللى بياخذ دخل أكبر، ونبتدىء من يونية.. ده اقتراح أو اتجاه.

الاتجاه الثانى: إننا نبتدى بها كعملية اختيارية.. يعنى مانعملهاش عملية اجبارية لكن نعملها عملية إدخارية. ويمكن رد فعل للكلام اللى انتشر أحيانا فى بعض الجرائد على اعتبار الإدخار ده إدخار اجبارى.. يعنى بعض الجرائد نشرت قالت الإدخار اجبارى وده أنا برضه رجوت الصحف، وقلت للأخ حاتم إنهم ميسموهوش الإدخار الاجبارى فيبقولوا يعنى ان رد الفعل يومين ونخليه اختيارى نبتدى بيه كمشروع اختيارى، ونحط الأهداف لكل مصلحة مثلا فى وزارة المرتبات اللى فى المصلحة دى مثلا ألف جنيه، يبقى التالف بتاعها ٣٠ جنيه، دى ٢٠٠٠ جنيه يبقى التالف بتاعها ٦٠ جنيه.. وهكذا.

وبعدين يوزعوا بتعدل فيما بينهم بحيث إن مدير المصلحة مثلا يدخر أكثر من يوم التانيين يدخروا أقل.. وهكذا. وجايز تصل المصلحة أو الشركة دى الى الأجر الاختيارى ده وجايز ماتصلش اليه، وتبقى عملية دعاية وعملية صعبة. وبعدين فى السنة اللى بعدها لما تتجح العملية ويقدموا التوعية الصح يصح إنه يبقى إدخار منظم وشامل.

ضرورى إننا نطبق طبعا الاقتراح الأول أو الاتجاه الأول، إننا نتدرج فيه.. يعنى ممكن تطبيقه وممكن الاطمئنان الى نتيجته، يعنى ممكن إننا نضبطها بالضبط. ونقدر نقول يعنى مثلا: نصف يوم للى بياخذ مرتب معين ويوم للى أكثر من مبلغ كذا، وفيه اقتراح تانى إن احنا نعمل ٢٪ لسهولة الحساب.

٢٪ على اللى أقل من ٢٠ جنيه.

٤٪ على من ٢٠ مثلا الى ٦٠.

وبعدين ٦٪ على اللى أكثر من ٦٠ جنيه فى الشهر.

دى ممكن نحسبها بحيث أننا ممكن نصل برضه الى ١٥ مليون جنيه.

الاقتراح الثانى إننا نخليه اختيارى فى البداية، وبعدين نتدرج فى العام المقبل الى النظام الاجبارى أو النظام العام. مانقدرش نظمئن إليه فى الناحية المالية والميزانية، ولكن إذا عملناه من الناحية السياسية أو إذا أخذنا به من الناحية السياسية لسهولة تطبيقه سياسيا، أعتقد أن من الضرورى أننا نطبق جنبه حاجة تانية، يعنى مثلا زى ١ قرش صاغ سجائر والا حاجة، أو زيادة الحد من نظام التقسيط وإجراء وفر إضافى فى التقسيط. يعنى إحنا مستعدين إننا ناخذ بأى نظام، ونحقق الحصيلة النهائية وفقا للتوجيه السياسى فى الموضوع.

سرى للغاية

عبد الناصر: وأنا والله ماتهمنيش الحصييلة دلوقتى فى العملية كلها، هو أنا اتكلمت كتير مع على إمبارح وعلى أساس إن احنا بناخد نصف يوم لغاية ٣٠ جنيه أو أكثر من كده.. باعتبار ٣٠ جنيه ٤٠ جنيه باخد نصف يوم لغاية ٤٠ جنيه بتمشى أو لغاية ٣٥ جنيه بتمشى ويوم لأكثر من كده.. مانقدرش ناخذ يوم لأن اللى أكثر من كده عليه برضه أعباء؛ لأن اللى يبجوز بنته واللى مش فاهم إيه! ويعنى أنا قابلت واحد من ضمن الناس اللى بياخدوا عليه أعباء، على أساس على طول بنلغى عملية الـ ٨ ساعات ولكن نلغيها بالطريقة يعنى لبقة.

يعنى بنقول إن احنا بنقدر المبادرة من العمال والشغل ٨ ساعات، وبنقبل هذا لمدة شهر أو شهرين، لكن على إن اللى كان بيشتغل ٨ ساعات وبيتسب له أجر إضافى مايتخصص منه الأجر الإضافى، وبعدين ننظم شغلنا على سبع ساعات ونمشى. لأن أنا فى رأى ٨ ساعات شهرين فى الشغل اللى ماشى ٧ ساعات، لأن بيربك الدنيا؛ لإن احنا على ما رسينا على السبع ساعات مشينا فى مشاكل كثيرة جدا وآجى أرجع ٨ ساعات! فيه مصانع فيه عمال مارضيوش، فيه عمال قعدوا وعمال مشيوا وخصموا منهم وعمال عملوا مش فاهم إيه! وبس بتطلع العملية على أساس ان بيتشرح بكره يتعمل مؤتمر صحفى.. إيه نظام الإدخار؟ إن حايبقى فيه دفتر وإن مثلا لمدة بعد فترة معينة الواحد يقدر يسحب أو يستلف عليه أو.. أو.. الخ هذا الكلام، ويتعمل حملة إعلامية كبيرة جدا على نظام الإدخار. عملية إلغاء الساعة دى هى بتمشى العملية الثانية هو عملية الساعة دى هى اللى بوظت.. يعنى تقرير كفر الدوار مثلا مش جايبه على الإدخار حاجة جايبه على الساعة.. موضوع الإدخار مش جايبه عليه. كفر الدوار فيها ٣.. فيها تكتل عمال كله على الساعة، مافيش كلمة على الإدخار.

وهو الحقيقة لهم حق لما تبيجى تقول له: إن احنا قررنا نشتغل ساعة زيادة قول له سنة تشتغل ساعة زيادة لمدة سنة، مايقاش أخذت المكاسب لأ.. تبقى متطوعا. ومقالش فى الميثاق، قال ساعة زيادة وسابها مطلقة بهذا على طول سحب المكاسب بيبقى slogan فعلا بينقبلوه. ببيجى هذه العملية على طول بتنعكس على عملية الإدخار هه إيه الحكاية؟! حددوا الأجور وعمالوا كذا، وعمالوا تخفيض وبتاع، ودلوقتى بيرجعونا ساعة زيادة وبيخصصوا منا يوم! بقت العملية فيها حصييلة كبيرة وبيجى العامل يقول لك: أنا فعلا بيتخصص منى مش يوم بيتخصص ستة أيام! لأنى باشتغل ٥ أيام إربع فى الساعة الزيادة، وبأشتغل وبأدى يوم الإدخار كمان متاخذ منى يوم! وإذا جنب ده بنفرض ضريبة قرش على السجاير أنا رأى بتمشى فى مجلس الأمة مافيهاش حاجة أبدا.

صدقى: الناس منتظراها.

صبرى: الحقيقة ممكن نتلافى برضه الضريبة، فيه مقترحات الدكتور القيسونى عنده مقترحات.

عبد الناصر: وإحنا لو ما ناخدش يبقى أحسن، يعنى إيه؟ يعنى أنا لما جاء لى الكلام عن الضرائب، كنت باقول لعلى: ان الحكومة لا تحتل.. أنا رأيت قلت له الحكومة لا تحتل؛ يعنى فيه شد فى البلد بالنسبة للأسعار وبالنسبة للتموين وبالنسبة لعمليات..

أما شفت أنا أول بيان بتاع الضرائب، وكان فيه كلام على إن أنا حتى بأروح مجلس الأمة وأتكلم، قلت لهم: إن العملية يعنى أنا مستعد أتكلم لكن السنة دى بالذات لا نستطيع إن احنا نعمل فيها ضرائب.. يعنى كان رأيي بهذا الشكل. والموقف اللى حصل فى الخريف اللى فات؛ فعلا البلد كانت متكتلة.. يعنى كانت البلد باعتبار فى وضع سئ بيعوز عمل كثير.. مانجيش نعمل ضرائب، ووافقت على حكاية الإدخار.

الحقيقة عملية الإدخار باظت برضه بالجري، ده عايز ياخذ الـ show وده عايز ياخذ الـ show! وكان لازم الخطة تتعمل ويحصل كل الأجهزة تشتغل فيها؛ فى الوزارات تشتغل واللجان فى الوزارات - لجان الاتحاد الاشتراكي - وكل واحد يشتغل.. فباظت. الحقيقة يعنى النهارده أنا باعتبار فيه خلل فى أجهزة العمال، مايخوفنيش لكن أنا خايف من الـ expectation بتاع هذا الخلل والقوى اللى ممكن تشتغل قوى!

وبعدين برضه النهارده الغرب بيضغط علينا اقتصاديا، وعايزين يجدوا منفذ علشان يوجدوا لنا المشاكل. بعدين الناس فاهمة وعندها وعى، وبعدين الناس تاترة على القيادات من تحت. اللى أنا حاسس بيه الناس حتى العمال تاترين على القيادات بتوع الاتحاد الاشتراكي، وفيه فجوة كبيرة جدا بين القواعد وبين القيادات. وأنا رأيت أن القواعد كويسة جدا ولكن القيادات فيها خلل، فكل اللى أنا عايزه إن احنا نلم الموضوع؛ بحيث ان ماحدث أبدا يقدر يعمل أى نوع من الـ expectation، ونلم العمال خالص ونهتئ كل العملية، ونحط تمللى قدامنا قاعدة أساسية إن احنا ركائزنا العمال والفلاحين.

بالنسبة للعمال والفلاحين اللعب عليهم صعب قوى بالنسبة على التجار والبقالين والطبقة المتوسطة، وحتى كل العمليات دى ممكن تكون مائعة، لكن بتضمن بالعمال إنك تمسك كل الموقف السياسى. إذا جينا عملنا خلل لأى سبب ما الحقيقة بنبص نلاقى الركيزة اللى احنا واقفين عليها ماهياش فى إيدنا! وممكن ناس قاعدين بره على طول يقدرؤا ياخدوا أوضاع قيادية. أنا باقول مثلا النهارده الشيوعيين، أنا شايف الشيوعيين ولا تأثير لهم، النهارده ممكن ياخدوا وضع قيادى بأنه يقول يجب أن نقاوم سلب المكاسب الاشتراكية؛

سرى للغاية

على طول يطلع slogan يجذب ناس يبقى، على طول الشخص اللي بيدخل بهذا الـ slogan يبقى له وضع قيادى، والناس القيايين بتوعنا اللي احنا معتمدين عليهم وعاملين فيهم تنظيمات وبتاع، بيفقدوا قواعدهم وينتهوا.. الحقيقة ده تشخيصى السياسى للوضع.

صدقى: هو لوسمحت سيادتك فى النقطة دى فيه نقطة مهمة جدا، وهو إن احنا نعلن أن لا رجوع فى القرارات الاشتراكية. يعنى باعتبار إن دى عملية مهمة لان الحقيقة موضوع الـ ٨ ساعات ثم ما تبعه من إن نصف الأرباح بنرجعها..

عبد الناصر: ودى حكاية.. هو بيقول لك إحنا بنتنازل على نصف الأرباح اللي انت بتاخذها يعنى اللي همه مايباخدوهاش! هى منظر أكثر منها لأن هم بياخدوا ١٠٪ بس من الأرباح مايباخدوش ٢٥٪؛ فيجوا يقول لك: أنا بأتنازل عن نصف الأرباح من اللي مايبقبضوش! عملية الحقيقة برضه تهجيص! (ضحك)

صدقى: إذأ الإعلان بان احنا لا رجوع فى القرارات الاشتراكية يافندم، دى عملية أساسية.

عبد الناصر: لأ ده ممكن بيجى كلام، نتكلم ونوضح.

صدقى: وأنا رأى بيجى من سيادتك؛ لأنه العملية تتلم.

عبد الناصر: فى موضوع الإدخار، فى رأى إن حد بيشرح العملية.. الدكتور عبد المنعم بيشرح العملية أو الأخ على بيشرح العملية بحيث الناس تفهم، وبعدين أجهزة الاعلام كلها تكون موجودة. إحنا مثلا عملنا مؤتمر للصحفيين وشرحنا لهم اللي حصل فى مؤتمر رؤساء الحكومات، وراحوا ناس وشرحوا لهم وأدوهم كل اللي حصل؛ بحيث ييقوا فى الصورة علشان يواجهوا الكلام اللي بيقولوه السوريين لأن السوريين. كانوا مدخلين صحفيين بتوعهم جوه اللجنة، فإحنا الصحفيين ما عندهمش فكرة، وتلاقى حاتم نفسه ما عندوش فكرة بالنسبة لموضوع الإدخار!

حاتم: أصل مجلس الأمة هو اللي أعلن الأول؛ بوظ العملية.

عبد الناصر: حذار من مجلس الأمة بيقولك راجل.. (ضحك) هو اللي أعلن الخصم هم أول ناس أعلنوا خصم اليوم.. ماقالوش إدخار ولا.. هو أحمد فهيم اللي وقف فجأة وقال..

سرى للغاية

صدقى: هو فيه نقطة ثانية سيادتكم لو سمحت اللى هى صورة النواحي الاقتصادية فى البلد، هو برضه علشان نوعى الناس بفايدة الإدخار وضرورته و.. و.. الخ، يمكن إحنا غالينا أو الصحافة أو أجهزة الاعلام المختلفة فى الكلام وفى كله. فيها حاجات طلعت غير حقيقية وطلعت من أين الواحد مايعرفش! يعنى أنا قرأت إن احنا الحكومة حاتفرض تأمين على تذكرة الأتوبيس والترام تأمين على الركاب. راكب الأتوبيس وراكب الترام والناس كانت بنتتدر بهذا الصورة يافندم؛ انها يعنى الحالة بقت سيئة جدا الى درجة إن الحكومة يعنى بدها تشوف إيه اللى تقدر تفرض عليه فلوس علشان تاخذ من الناس! فأنا باقول إن برضه يعنى..

عبد الناصر: ما هو ده اللى أنا باقوله: ان فيه انطباع وده موجود إن احنا بنحاول نلف ونهرب ما بنحاولش مواجهة، وده برضه يجب إن احنا نقضى عليه. قطعاً إذا كان يطلع كلام زى ده إن احنا حانعمل تأمين على راكب الأتوبيس يعنى هذا اللى بيؤدى..

صدقى: وبيتلقوه بقى أهداء هذا النظام، وبيقولوا: دى الحكومة فلست! دى بيدوروا على مش عارف إيه. فأنا باقول يعنى الناحية دى برضه وسيادتكم فى خطابك قلت هذا الكلام إن احنا نقدر نلغى مشروع ولا اتنين وخلص وما فيش حاجة. لكن الصورة إن لأ.. الحالة سيئة اقتصاديا سيئة؛ ولذلك الحكومة مش عارفة تعمل إيه! فأنا باقول: لأ.. حتى موضوع الإدخار إذا سرنا فيه بيرز على حقيقته؛ وهو أنه موضوع إدخار. وكان الحقيقة الـ approach الأولانى سليم؛ أنه زيادة فى الاستهلاك معناه إن الناس بتصرف فلوس أكثر من اللازم، فالإدخار ده بيحد من الاستهلاك مش علشان ناخذ الـ ١٥ مليون جنيه دى، لإن احنا مزنوقين فى ١٥ مليون جنيه! يمكن هو ده المدخل اللى بيبين ميزة الإدخار عن الحلول الأخرى، فلو برضه يبقى فيه توجيه إن من يتناول هذا الموضوع بالمناقشة أو بالعرض فى الجرائد وفى غيره..

عبد الناصر: يعنى أنا رأيت حتى إن على يعمل حديث للأهرام مع هيكل، وتقعدهم الحديث سؤال وأجوبة عن الإدخار والفكرة إيه والعملية إيه.. مانهرش! ما حدش مصدق إن العملية جاية من تحت، وانتوا فاهمين الناس عبط! أوعى تفتكروا إن حد مصدق إن.. ولو كانت جاية من تحت ما حد حايمصدق. ولا زالوا الناس لغاية النهارده معتقدين إن احنا كل كلمة بنتكتب فى الجرائد إحنا بنراجعها ومسئولين عنها! ده طبيعة الانسان طبيعة الناس لذلك يصدقوا على

سرى للغاية

طول الكلام اللى بيتقال. انت تطلع يتعمل حديث ويتشرح فيه موضوع الإدخار، يتقال إن حايبقى فيه دفتر وإنه حايسحب وإنه كذا.. وكذا .. إلخ.

مع الكلام اللى حانطلعه الليلة، ونقول: إن احنا بحثنا هذه المواضيع والاقتراحات بتاع العمال، ونقول رأينا فى الإدخار وبنروح مجلس الأمة برأينا.. يعنى مجلس الأمة بيوافق على رأينا ولازم يكون موافق على هذا الرأى يعنى.

صبرى: هم جاهزين.

عبد الناصر: يعنى إيه أنا كمان بدى أقول: ماأروحش مجلس الأمة وأقول له دبر لى، برضه بيشنعوا علينا بتوع مجلس الأمة وبيتكلموا فى العمليات دى. أنا بأروح له باقول له عندى ٢٨ مليون جنيه عجز دبر لى بيقولوا الحكومة بتهرب وبتزقنا! وده مايبحصلش.

أنا بأروح لمجلس الأمة وأقول له عندى ٢٨ مليون، وأدى الاقتراح ونرسى عليه أو نمشى الميزانية بعجز. يعنى أقول: إن أنا عايز أمشى الميزانية بعجز! وممكن يحصل. لكن هم برضه السنة اللى فاتت اتكلموا على عملية التدبير. السنة دى بيتكلموا بتوع مجلس الأمة يعنى بيقولوا: الحكومة ده تبقى ازدواج تزقنا إحنا، عايزه تحملنا إحنا مسئولية العمل! وفى رأى أن قدام الناس نحن نتحمل كل شىء.

إحنا متحملين العملية كلها، فبنروح بحاجة محددة وأدى الحل ونمشى يعنى. ولو كنا مش عايزين نفرض ضريبة بنختصر شوية فى المصروفات، والـ ١٥ مليون دى بتاع الإدخار تنزل تبقى ١٠ مليون أو ٩ مليون أحسن.

صدقى: هو رسم السجاير يافندم فيه الناس منتظراه يعنى.

عبد الناصر: آه.

صدقى: وهو ٧ مليون أو ٧,٥ مليون فى القرش صاغ، ودى تمشى من غير...

عبد الناصر: كنتوا جايين الأول بقرشين.. يعنى إذا كان الاقتراحات اللى جاية لى الأول بقرشين على السجاير يعنى تبقى ١٤ مليون.

صدقى: والله يافندم دى أثرها أقل من يوم الإدخار، يعنى حقيقة حاتبقى قرشين مرة واحدة ولكن بالنسبة للشخص اللى بيحسب النهارده، مرتبه حاينقص كذا فده الآخر بينقص السجاير. هو

سرى للغاية

مش حاينقص السجاير ولا حاجة اللى حايجصل ان هو بيتهيأله انه حايقدر ينقص السجاير
يبقى أثرها أقل. فأنا باقول يعنى إن الناس منتظرة السجاير يعنى إحنا لو ماعناهاش الناس
حاتستغرب، يعنى يبقى إحنا ليه بقى..

عبد الناصر: أو نعمل الإدخار كله نصف يوم، يعنى برضه أنا مثلا حصل اجتماع فى الإسكندرية فى
الموانىء وقعدوا على موضوع الإدخار، وبعدين فى الآخر عملوا تصويت سرى؛ ٩٠٪
ماوافقوش!

صبرى: ماوافقوش!

عبد الناصر: وبعدين طبعا عملية التبرع اتلخبطت مع.. يعنى العملية اتلخبطت خالص.

أبو النور: تفهيم الناس.. أنا أشرح لسيادتك إحنا جينا الناس بتوع الاصلاح الزراعى..

عبد الناصر: ما إحنا المسئولين عن تفهيم الناس!

أبو النور: إحنا جينا الناس بتوع الاصلاح الزراعى فهمناهم واضح؛ العملية إدخار وإزاي هاياخد
إدخار، وإزاي حايقدر يصرفه امته يقدر يصرفه، وفهمناهم إن دى مش منه بيعملوها ولا
شياء دى الدولة أعطتهم الفدان بخمسين جنيه يطلع ايجار سنتين، وإن الدولة بتصرف
عليهم فى الاصلاح الزراعى سنويا ٢٠ مليون جنيه اللى كنا حاناخده منهم فى السنة مليون
ونصف.. يعنى ممكن نخصمه من العشرين مليون وماناخذش منهم حاجة. لكن إحنا عايزين
الخدمة تظل لهم ونظل نخدمهم وهم يخدموا يعنى يدخروا لمستقبلهم ومستقبل أولادهم. ابتدأوا
يفهموا العملية ويفهموها على واضح.

عبد الناصر: أصل مجتمع الفلاحين غير مجتمع المدن.

أبو النور: فعلا.

عبد الناصر: يعنى مجتمع الفلاحين مجتمع غلبان ومسكين.

سرى للغاية

أبو النور: ولما يفهم ماحدث بيلعب فيه.

عبد الناصر: هو مجتمع العمال أقوى من مجتمع الفلاحين، حتى مجتمع الفلاحين لو ببيجي على نفسه ببيجي على مسئوليته.

النقطة الثانية طيب إفرض - ماعرفش تقديركم إيه - إذا عملنا الإدخار اختياري

تقديركم إيه؟

أصوات: ماحدث.. مافيش.

صبرى: حايمشى فى المتقفين بس.

عبد الناصر: والعمال؟

صبرى: بعض العمال أو بعض.. فى الشركات.

...: لو مشى المتقفين ماينجحشى.

صبرى: لأنهم أقرب الى الموظفين من العمال.

...: لو اختياري؟

عبد الناصر: مافيش؟

القيسونى: هو لو اتعمل اختياري يخيل لى لازم يكون عندنا موارد أخرى للا ١٥ مليون كلها.

عبد الناصر: آه.

سرى للغاية

القيسونى: وبعدين أى حاجة تبيجى من الإيدار تبقى بداية للنظام الجديد فى السنة الجاية.

رفعت: لو اختياري ممكن الجهات تضغط على الناس اللي عندها وتبقى عملية منافسة.. ده أكثر وده..

عبد الناصر: ماعرفش يعنى هل نعمل كله نصف يوم.. نعمل لغاية ٣٠ نصف يوم؟

صدقى: والله يافندم عدم التفرقة أحسن، يعنى نصف يوم للكل؛ يمكن واحد عنده ماهيته ٤٠ جنيه وعنده ستة أولاد، وواحد أقل من ٣٠ جنيه ولوحده خالص. والحقيقة الحالات دي موجودة والناس حاتتكلم عنها؛ فيعنى نصف يوم عن الكل تقبل أحسن.

محي الدين: هو جاءت لى اقتراحات كثيرة قوى على أساس التدرج حاجة غريبة.. فيه تدرج لأن ده ياخذ ماهيه ٣٠ وده بياخد ٨٠.

عبد الناصر: التدرج فيه طبعا ناحية معنوية، ولكن ممكن نخلى ٤٠ بدل ٣٠.

صدقى: ويبجى يقول لسيادتك: لو أخذت العلاوة يمكن نتيجة لأنى حادفج نصف فى المائة زيادة كأنى مأخذت علاوة، يعنى كان بياخد ٣٩ وبقي ٤١ مثلا بالعلاوة.

عبد الناصر: ها؟

صدقى: فحايخش فى الفئة الثانية يعنى.

عبد الناصر: بالتأكد دي صغير.. حاجات صغيرة.

صدقى: هو المساواه هنا يبقى بتنفيذ أكثر يافندم، يعنى يوم بالكامل يا نصف يوم بالكامل.

القيسونى: وإحنا إذا أخذنا نصف يوم فى الأول وبعدين يوم على اللي أكثر من رقم معين، أعتقد أننا يجب أن الـ demarcation value بتاعنا تبقى أقل من ٣٠، والا يعنى تبقى ٢٠، حسبناها

سرى للغاية

على أساس ٢٠ هي ٢٠ جنيه في الشهر من الـ ٤٦ مليون اللي بتوزع كأجور ومرتببات في القطاع المنظم فيه حوالي ٢٠٠ مليون أقل من ٢٠، و ٢٣٠ أو ٢٦٠ فوق العشرين إذا ارتفعنا أكثر من ٢٠ جنيه. فأعتقد أحسن نطبقها على الكل نصف يوم لأن قيمة الأجور اللي بتدفع للناس اللي بياخدوا أكثر من ٤٠ جنيه مثلا..

عبد الناصر: يبقى نطبقها على الكل نصف يوم، والسنة الجاية بعد مانعمل تبقى يعنى..

القيسونى: إذا عملناها نصف يوم حاتبقى ٧,٥ مليون جنيه، وبس مش عارف كمان إذا كان ضريبة نسبة الإدخار مثل الضريبة في ايراد الاصلاح الزراعى وإدخار ربع الضريبة على باقى الأراضى. هم كانوا مرتبطين بإدخار يوم في المدن، إحنا قلنا ندخر يوم في المدن وندخر مثل الضريبة في الاصلاح الزراعى وربع الضريبة على باقى الأراضى.

أبو النور: بس ربع الضريبة على باقى الأراضى تيجى إزاي؟ ماحدث أولا قالها.. ولاحد، يعنى صعب جدا على بتوع الاصلاح الزراعى، ده راجل استفاد لكن التانيين حانقول له ربع الضريبة على إيه؟!

محي الدين: أصله هو مش..

عبد الناصر: الاصلاح الزراعى ماأقدرش آخذ منه مثل الضريبة.

أبو النور: ١,٥ مليون.

محي الدين: يعنى لما يدفع أربعة جنيه ثلاثة جنيه مثلا..

أبو النور: هو متوسطها ٢,٥ على الفدان.

عبد الناصر: هو أغلب ناس برضه بصرف النظر بتوع الاصلاح الزراعى.. يعنى هو اللي عنده ٣ فدادين مش كده؟

سرى للغاية

أصوات: متوسطه.

عبد الناصر: ثلاث فدادين، حاتيجى تاخذ من اللى عنده ثلاث فدادين مثل الضريبة، بتبقى اديته الأرض مجانا ورجعت تانى لحستها؛ ما هو برضه يعنى Politically رأى غلط!

أبو النور: إذا كنا حانوصل للنصف يوم، بننزل برضه مع دول للنصف وتمشى مع بعضها.

القيسونى: تسمح لى أوزع الـ...

عبد الناصر: إفضل.

القيسونى: يمكن فى الصفحة الأخيرة الاقتراحات اللى استقر عليها رأى فى لجنة الخطة والميزانية.. مشروع للإدخار ٣٠ مليون جنيه. إذا كان الإدخار يوم حانفضه الى النصف الـ ١٥ حاتبقى ٧,٥ مليون جنيه وبعدين كان ضريبة الاصلاح الزراعى على الايراد يالما حانشيلها والا حانخففها الى النصف؟ مش عارف رأى سيادتك إيه؟

عبد الناصر: يعنى هى العملية مافيهاش عدالة يعنى؛ بتيجى لبتاع الاصلاح الزراعى وبتاخذ منه مثل الضريبة وبتيجى للتانى وبتاخذ منه ربع..

عبد الناصر: باعتبار إن بتاع الاصلاح الزراعى استفاد.

أبو النور: يعنى لو سمحت لى سيادتك.

عبد الناصر: استفاد من العدم.. هو استفاد يعنى...

القيسونى: أيوه بس فيه ناس تانيين برضه.

أبو النور: كنا عرضنا عملية توزيع الكسب على مجلس الأمة تانى، الطريقة اللى كنا اتفقنا عليها هنا التأميم وتوزيع جزء آخر على بقية الناس، ورفعنا ثمن الكسب وسوينا بين الكسب والعلف وعرضناه على مجلس الأمة. ووافق كله على هذا الأساس.. على أساس إن احنا بندى

سرى للغاياة

للمؤم طن الكسب والعلف بـ ١١,٥ جنيه والحر اللى هو غير مؤم بـ ١٤ جنيه، والناس فعلا مابتوصلش للكسب بهذا المنظر. فإحنا لو اديناها بهذا الشكل كلهم قابلين على انهم بيضمنوا الكسب ياخدوه، وتدينى وفر ٢,٥ مليون جنيه.. توفر الكلام ده كله.

القيسونى: هو الكسب والأسمدة يعنى...

أبو النور: السماد ممكن أزود ١٠ صاغ برضه.

عبد الناصر: يقبلوا قوى ١٠ صاغ.

أبو النور: كل الناس مستعدين لأن مادامهمش غير كده.

عبد الناصر: لأ.

أبو النور: ١٠ صاغ للشوال يدينى برضه ٢ مليون جنيه.

صدقى: يمكن يجيب ثلاثة.

أبو النور: لأ.. أنا عندى حسبتها حأجيبها لك.

صدقى: ليه؟ ماهو الطن ٢٠ شوال وإحنا بنستهلك ١,١٣٠,٠٠٠ بيقى ٣,٢ مليون.

أبو النور: أنا أجيب لك حسبتها عندى.

عبد الناصر: دلوقتى إذا رجعنا لبنك التسليف الفوائد يدينا أد إيه؟

القيسونى: ٣٪ مثلا ولا ٤٪.

عبد الناصر: ٤٪ لأن يعنى هو اللى بيقى فى إيده.

سرى للغاية

القيسونى: حوالى ٢ مليون جنيه.

الشافعى: ٣ للتعاون و... للأخطار.

عبد الناصر: رجع الفوائد كلها؛ لأن الحقيقة أنا مثلا اللي بيستفيد من بنك التلسيف هم..

صدقى: كبار..

رفعت: لأ.. الكل بيستفيد.

صبرى: إنت بتصدق؟

عبد الناصر: يصدق إيه؟! ماهى مش نافعة، يعنى إنت بتصدق إن احنا..

...: سيادتكم كانت متعلقة على أساس منع الربا، وبعدين هى فعلا بتفيد الكل.

أبو النور: هو إحنا كنا طلبنا إن احنا اللي فوق الـ ١٠ فدادين نبتدىء ناخذ عمولة، يعنى البنك لازم ياخذ عمولة.. البنك بيصرف فلوس.

عبد الناصر: يعنى معقول بأخلى الفلسفة دى لتحت عشرة فدادين وبأشيل العملية.

أبو النور: ومش حاقول ربح برضه حاقول عمولة؛ لأن البنك لازم ياخذ عمولة.. جايب موظفين وبيشتغل حاجيب فلوسه منين!؟

الشافعى: ده عنده عجز ٥ مليون جنيه.

أبو النور: طيب ماأنا باقول: بأخذ عمولة من اللي فوق العشرة فدادين.

عبد الناصر: فوق ١٠ فدادين ياخذ ٤٪ واللى عنده ١٠ فدادين ماياخدش.

سرى للغاية

محي الدين: أسميها مصاريف إدارية.

أبو النور: آه.. المصاريف الادارية بتاع البنك.

عبد الناصر: ودى تدينا كام؟

القيسونى: مش عارف التقسيم بالضبط؛ لأن ١٠ فدادين على الحائز مش على المالك.

أبو النور: آه.. على الحائز طبعا.

عبد الناصر: آه.

القيسونى: وقلنا الاتجاه السنة دى إننا نقلل المتأخرات خالص.. نقلل المتأخرات بعشرة مليون جنيه على الأقل. المتأخرات بناخد عليها ضريبة.. بناخد عليها فايدة، كان أوقفت الفائدة فى وقت من الأوقات وبعدين اتفقنا على إعادتها؛ اللي هي ٦٪.

أبو النور: فائدة التأخير.

الشافعى: وفيه نقطة تانية بالنسبة للتأخير، لازم يخش فى عملية الفائدة سواء كان ٥ فدادين ولا أى حاجة.

أبو النور: التأخير ماشى على الكل يعنى فايدة التأخير ماشية على الكل، هي حصيلة الكسب تطلع ٢,٥١٢,٠٠٠ جنيه والأسمدة ٢,٠٤٨,٠٠٠ جنيه؛ يبقى معناها ٤,٥ مليون جنيه زى كده.

القيسونى: وأنا مش عارف يعنى تعديل نظام الفائدة يعنى يدخل مع الميزانية، ولا نمشيه تعديل؟

عبد الناصر: لأ.. تعديل، هو عايز قانون ولا حاجة؟

أبو النور: لا.. لأ.. دى تتعمل لوحدها من غير ماحد يدري.

سرى للغاية

القيسونى: مش عارف إذا كان التانى طلع بقانون يبقى لازم نطلع..

أبو النور: لا .. لا قانون ولا حاجة من ..

القيسونى: الاعفاء من فائدة؟

أبو النور: أبدا.. أصلنا مش حاناخذ فائدة، إحنا بناخذ عمولة للبنك نظير الخدمات اللي بيؤديها مالهاش دخل؛ مصاريف إدارية يعنى.

القيسونى: برضه الناس يعنى مش حانتقبلها قوى.

أبو النور: لا لأ ممكن سهلة قوى.

القيسونى: وعلى كل حال ممكن أن يحل محل مثل الضريبة على الاصلاح الزراعى وربع الضريبة على باقى الأراضى، مسألة الكسب والأسمدة تقريبا حاجيب نفس الحصيلة.

أبو النور: ٤,٥ مليون.

القيسونى: يبقى فاضل عندنا تدبير الـ ٧,٥ مليون، اللي هى نتيجة إننا نخفض إيدار يوم الى إيدار نصف يوم يعنى ممكن إنها دى تيجى من السجاير، وممكن إنها تيجى إذا اتبعنا بقى نظام جديد بالتقسيط، بس النظام لازم يكون فيه discipline جامد يعنى اننا نلغى نظام التقسيط أو نلغيه تقريبا.

عبد الناصر: لا والله أنا ليه فى موضوع التقسيط ده كلام، يعنى فيه ناس بيكسوا أولادهم بالتقسيط يعنى إحنا كنا بنروح نشترى هدمونا من الجمعية التعاونية المنزلية بالتقسيط.

القيسونى: بس لو كان ناس بتدفع.

أبو النور: بالتقسيط على سنة.. التقسيط مالوش دعوة.

سرى للغاية

عبد الناصر: يعنى الجمعيات التعاونية المنزلية فيها حاجة! كنا بنزوح نشترى منها، وبدون كده كان بيبقى الحقيقة صعب إن الواحد اللي عنده كتار يتكشف!

أبو النور: اللي عنده ستة أولاد ورايح يشتري ستة أزواج جزم و..

عبد الناصر: ليه؟ لأن بتيجى على عملية دخول المدارس كلنا كنا بنجيب بدل وجزم، مين موظف بيجى عنده مبلغ يقدر يكسى، وأدى إذا ماكانش الواحد يجد تقسيط؟! أنا متهيألى الموضوع موجود لغاية النهارده.

أبو النور: لأن على سنة.. يعنى عملية على سنة.

عبد الناصر: فهى عملية Human يعنى فأنا إن ألغى التقسيط فى التلفزيون ألغى التقسيط فى العربية ألغى التقسيط فى التلاجة، لكن اللي بيكسى أولاده من عمر أفندى.. اللي عنده خمسة أولاد!

محي الدين: هو البقال والكسوة الحقيقة..

عبد الناصر: يعنى عملية.. والله أنا فى رأى الموظفين الكبار مايقدر يكسى، لو عنده بنتين وعازب يجيب لكل بنت فستان وملابس داخلية علشان تروح الجامعة، وولدين عازب يجيب لهم كل واحد قميصين وبتاع، إذا ماجابوش بالتقسيط عمرهم ماهايتكسوا!

استينو: واللى بيجوز بنته.. الحياه صعبة جدا.

عبد الناصر: آه.. أنا باتكلم حتى على اللي بيجوز بنته يقدر ياخذ سلفية زائد برضه سلفيات البنوك. أنا رأى إن احنا مانصرفش فيها، يعنى مانضيقش على الناس وإلا بيطلع أى واحد فى البلد دى ويعمل ثورة! يعنى الناس صاحية جدا ومانتصروش إن الدنيا يعنى كده. يعنى إذا كنتوا فاهمين انكم حاتضيقوا على الناس.. يعنى أنا والله الجوابات اللي جاية - أنا جايب لكم أمثلة - الناس متضايقة والشكاوى اللي ماحدش بيرد عليها وأنا جايب لغاية هنا وحاقرأ لكم أنا بتجلى.. والطوائف اللي أخذ واللى مأخذش وده عمل وده ماعلمش، مانجيش نخنق

سرى للغاية

الناس! وبعدين طيب يقولوا لنا ليه إحنا عملنا التقسيط؟! يعنى دلوقتى مثلا عملية التقسيط من عمر أفندى إيه فيها؟!

أبو النور: جاب ٧,٥ مليون جنيه.

القيسونى: بيزود الاستهلاك، ماهى الفكرة كلها ناشئة على انه بيزيد من الاستهلاك.

أبو النور: أصله بيدفع فى سنة.. بيخلص فى نفس السنة.

صبرى: مافيش مانع فى الحاجات دى يادكتور عبد المنعم كفاية الشاى والأكل.

القيسونى: لا والله ماكانش دى برضه، مثلا المنسوجات.. زاد استهلاك المنسوجات يعنى برضه.

عبد الناصر: زائد الناس زادت فى السنين اللى فاتت ٨ مليون، مش حايلبسوا الثمانية مليون دول؟! نقول اللى إتولد بعد ٥٢ يمشى عريان نطلع قانون! (ضحك) زادت البلد ٧، ٨ مليون دول بيتكسوا!

القيسونى: إذا كان بين ٦٣ ، ٦٤ وبين ٦٤ ، ٦٥ يمكن حصلت الزيادات الكبيرة.

استينو: مش فى الملابس.

صدقى: لا.. فى الأقمشة.

استينو: مش فى الملابس يعنى زاد زيادة كبيرة فى...

عبد الناصر: يعنى أنا والله متصور إن فيه عمليات فى البلد لازم نراعى فيها النواحي الانسانية، يعنى وإلا بنبقى بنطغى! يعنى عملية اللى بيشتري من عمر أفندى ماهو حايشترى قد ماهية شهر.

أبو النور: وبيقسط شهر على السنة.

سرى للغاية

عبد الناصر: آه.. شهر على السنة، واللى بيستلف من البنك بيستلف قد ماهية شهر.. دى عمليات الحقيقية الظروف.

صدقى: بتقابل ظروف يافندم مضطر.

عبد الناصر: لازم اللى حايروح يستلف من البنك إلا إذا كان مضطر؛ لأن ده حايروح يدور على واحد يضمه، ويروح ياطعوه فى البنك، إلا إذا كان مزنوق يعنى فعلا لعملية السلفية؛ فعملية السلفيات فى البنوك لانستطيع إن احنا نلغيها. أنا برضه شفت إن فيه حكاية لمنع السلفيات فى البنك لأن يتنعكس على كل طرف. بالذات هم الموظفين تعبانين.. يعنى الموظفين يقول لك إن العمال حصل لهم كذا وهم ماحصلهمش، وهم فى هذا بيدفع ٦٪.. مش بيستلف وبيدفع ٦٪؟ بياخد ب ٦٪!

أبو النور: أيوه.

عبد الناصر: وإذا ماكانوش حاياخدوا تسهيلات لأنهم يكسوا أولادهم هم برضه مش حايقدرنا يكسومهم، مانحيش فى العمليات دى ونقول نوقف التقسيط! وأنا رأيت موضوع الأوكازيونات كذلك يعنى بننظمها لكن مانمنعهاش؛ لأن فيه ناس بتشتري للصيف الجاى على آخر الصيف.. أوكازيون بيع الملابس الصيفية بيروحوا يشتروا منه للصيف الجاى، على أنه يشتري الحاجات بسعر رخيص اللى هو ناقص ٣٠٪ أو.. ولا إيه؟!

استينو: هو فعلا أنا كلمت السيد رئيس الوزراء وكان رأيت كده؛ لأن جاء لنا شكاوى كثير، وزى سيادتكم مابتقول طبقة الموظفين تعبانه جدا. يعنى حتى اللى بياخد ٤٠ و ٥٠ جنيه، ساعات بيحى يقول لى: أدى الفائلة مقطعة، عندى أولاد ومش قادر أكسيهم، والمعيشة ارتفعت ومنتظرين الأوكازيونات.. عايزين يشتروا فى الأوكازيونات والتقسيط حتى مانقدرش نلغى التقسيط ده، وإلا النهارده أنا كان عندى الدكتور الجمال بيقول لى: الناس فى حالة عدم رضا وتذمر علنا دلوقتى، وبيتكلموا علشان يوم الإدخار رفع الأسعار وإلغاء الأوكازيونات والتقسيط.. الخ. وفيه معنى حالة غير طبيعية!

عبد الناصر: وأنا حاسس بهذا.

سرى للغاية

استينو: يعنى يظهر الدول الغربية بتزق شوية.

عبد الناصر: لأ.

أبو النور: ياإخواننا هى المعيشة صعبة فعلا!

عبد الناصر: أصل باقول لك: فيه ناس مابيتكسوش إلا بالتقسيط تقول له مافيش!

استينو: يعنى أنا طبعا مابأخرجش فى الشارع، لكن هو النهارده بيؤكد لى الناس اللى ماكانتش بتتكلم بتتكلم على الإدخار، برضه نرجو إن احنا فى السياسة بتاعتنا ناخذ بالناس من العملية دى.

عبد الناصر: آه.

استينو: مانخليش الناس اللى دخلهم محدود - سواء كانوا موظفين أو عمال أو فلاحين - إنهم يبقوا عندهم فرصة إنهم يشتكوا ويتكلموا. وأنا كنت رجوت السيد رئيس الوزارة علشان ميعاد الأوكازيونات حسب القانون هو الشهر الحالى والشهر الجاى، وقال لى أبدا مافيش .. (ضحك)

عبد الناصر: أنا خايف على صبرى يكون قاعد فى لجنة الخطة الصبح وبعد الظهر فى مجلس الأمة وبينفصل الحقيقة عن الحاجات دى! يعنى أنا رأبى.. وبعدين أصل على صبرى يمكن مراته غنيّه نفسها (ضحك)، فإحنا كنا بنجيب هدمونا بالتقسيط من الجمعية اللى قدام البوستة دى بالدفتري إذا ماكانش الدفتري، والله ماكنت حاقدر أجيب.. حاقب مين؟! والدكتور القيسونى أبوه كان وزير حربية و.. (ضحك)

القيسونى: لأ.. هو قيل إحنا بدنا... من باب الاشتراكية يافندم؛ لأن قيل إن التجار هم اللى بيشتروا فى الأوكازيونات وبعدين يرجعوا يبيعوا!

استينو: لا لا لأ.

سرى للغاية

أبو النور: لا والله اللى بيروح التقسيط ويشوف زنقة الناس فيه، يعنى ماحدث فيكم راح أوكازيون؟

أصوات: أنا رحت .. أنا رحت.

القيسونى: لكن أوقات فى الأوكازيون برضه تبقى سيادتك تلاقى من أول يوم يمكن من أول ساعة فيه حاجات معينة بتختفى كلية من الأوكازيون؛ لأن بيبقى فيه اتفاق بين المحل اللى بيبيع وبين بعض.. وخصوصا بالنسبة للسلع المسعرة، يعنى أنا ماأفهمش إن سلع مسعرة نيجى نعمل فيها أوكازيون! وبعدين إحنا حاطين حد أدنى للسعر فى رأى بعد شهر أو..

أبو النور: بيبقى فيه عيب .

استينو: بيبقى فيها عيب فيه فضلات، ومن وجهة حتى التجارة كلهم كانوا معارضين فى إلغاء الأوكازيونات؛ لأن حتى التجار نفسهم بيتخلصوا من السلع الراكدة طول السنة؛ فهى من وجهة التجارة كان كل المحلات معارضة فى إلغاء الأوكازيونات.

صدقى: إنما هو ليه بس بنركز كل الأوكازيونات فى فترة واحدة؟

استينو: علشان نقدر نراقب.

صدقى: بس يعنى فى سبيل الرقابة دى أولا الواحد بيروح بيشتري يمكن لفترة بعد كده، وبعدين بتوجد فلوس مرة واحدة نزلت البلد بقدر كبير فى شهر واحد!

استينو: ده إحنا بنسحبها.

صدقى: فلو.. هل مش ممكن إن احنا spread it قوى كده شوية؟! بحيث..

استينو: هو ده إحنا بنعمل فى الصيف.

.... فى وسط الصيف وفى وسط الشتاء.

سرى للغاية

عبد الناصر: هو فيه نقطة بالنسبة للأوكازيون.. هو بينزل إيه؟ بينزل البضاعة اللي مايتباعتش!

أصوات: بالضبط.. بالضبط يافندم.

صدقى: لو وهو بلاش يافندم هم..

عبد الناصر: إنك بتسحب تمن البضاعة اللي مايتباعتش؛ لأن البضاعة اللي مايتباعتش إذا مايتباعتش حاتفضل حاتبات والسنة الجاية ماعادتش تمشى.

طراف: طبعا.

عبد الناصر: يعنى لأن أنا فى رأى كثير من اللى بيروحوا الأوكازيون بياخدوا مقالب!

أصوات: أيوه.

عبد الناصر: ولكن دى عملية أنا باتكلم عليها كعملية نفسية يعنى بالنسبة للناس.

القيسونى: بس دى متضخمة يافندم، فيه بحث هنا ظهر فى مجلة الطليعة بيقول: فيه ١٤ شركة زاد المبيعات بالأجل من ١٤ مليون جنيه سنة ٦١ الى ٢١ مليون سنة ٦٢/٦٣ الى ٢٦,٨ سنة ٦٣/٦٤؛ فبيزداد زيادة كبيرة، يعنى فى أقل من أربع سنين تضاعف القدر.

عبد الناصر: طيب ما هى الأجور تضاعفت ٣ مرات يعنى فى العشرة ١٢ سنة اللي فاتت!

القيسونى: لأ.. ده فى الثلاث سنين دى زاد المبيعات من ٦١ الى ٦٣...

... : طيب ماهو تغيير برضه من ٦١.

القيسونى: بس يعنى أنا من ناحية فكرة المستوى ونزود الأجور ونزود العمالة، أتصور أن المبيعات.. مش تزيد المبيعات بأجل أو على الأقل تفضل ثابتة.

سرى للغاياة

عبد الناصر: حاقول لك يعنى أنا رأىى إن احنا طالما فيه عرض أقل من الطلب، مافيش داعى أبيع بأجل. تعال امسك العربيات كلها متباعة بالأجل فدى بتسبب حجم كبير، إمسك التلفزيون أيضا كله متباع بالتقسيط بيمثل حجم كبير.. العربية والتلفزيون والثلاجة. إذا كان عندى الثلاجات العرض أكثر من الطلب مافيش مانع إن أنا أبيع بالتقسيط، لكن إذا كان عندى العرض أقل من الطلب البيع بالتقسيط غلط؛ لأن إنت تقدر على طول تبيع cash؛ لأن اللى مستعد يدفع cash متوفر فى السوق.

صدقى: والله يافندم إحنا عندنا مشكلة دلوقتى فى أجهزة التلفزيون بتاع فيليبس؛ عندى ألفين جهاز عايز أنزلهم السوق مش عارف أنزلهم! إزاي حانعمل حجز؟ حاييجى حجز ٢٠ مرة أد الألفين ولو بال cash! بناخد طلبات الناس تبعت لنا فورمة وتملاها، برضه حايقولوا: لأ.. ده أعطوا فلان وما أعطوش فلان! لأن المرة اللى فاتت ٤٠٠٠ جهاز راحوا هوا يعنى!

عبد الناصر: نزل الجهاز بـ ٢٠٠ جنيه وبيع نقدا.

صدقى: أرفع السعر؟

عبد الناصر: النهارده أنا مثلا شايف إعلانات العربية ١٣٠٠.. شايف فى الجرائد مباعه بـ ١٨٠٠ جنيه مستعملة وأنت بتبيعها أقل من ألف جنيه، طيب بنبقى إحنا الحقيقة فى هذا غلط.

صدقى: هى كان الاعتبار أيامها سيادتك عارف إن اللى حجزوا من ثلاث سنوات ودفعوا نقدا على سعر معين، هل نرفع السعر عليهم ولا لأ؟

عبد الناصر: نرفع.

صدقى: والله ده يريحنا.

عبد الناصر: وأبيع cash .. cash لازم.

سرى للغاية

القيسونى: دى نعملها رسم انتاج، مانقدرش نرفع السعر على الناس اللي حجزوا، ولكن إذا عملنا رسم انتاج يبقى لازم يدفعوه.

عبد الناصر: وأنا من رأيى إن عمليات الحجز كلها ملغية؛ نمرة ١ كل عمليات الحجز ملغية وأرفع سعر العربيات، وأنزل cash فى السوق وأعطيهما لـ agents، ولا أقول لحد يقدم طلب ولا حاجة. التليفزيون بأنزل cash لغاية السوق ما أشبعه، بياخدوا التليفزيون دلوقتى من هنا بيودوه لبنان الأدوية من هنا! واحد قال لى بعث جاب أدوية من لبنان وجاءت له عليها هيئة الأدوية، يعنى دى الحقيقة هى المواضيع الموجودة. أنا رأيى العربيات والتليفزيون والثلاجات والعمليات دى هى اللى زودت الكلام ده مش اللبس..

صدقى: هى فعلا كده.

القيسونى: هو فى عمر أفندى يمكن ٥ مليون جنيه تليفزيون.

استينو: التليفزيون لوحده ٥ من ٧.

القيسونى: لأ.. خمسة جملة التقسيط فى التليفزيون.

عبد الناصر: هو الواجب النهارده إن احنا نوقف التقسيط فى التليفزيون ونوقف التقسيط فى العربيات.

القيسونى: العربيات والثلاجات والسخانات.

عبد الناصر: الثلاجات.. إذا كانت العرض أكثر من الطلب أبيع بالتقسيط، إذا كان الطلب...

صدقى: أقل، إحنا عندنا عقود للتصدير الحقيقة حانجد صعوبة فى إن احنا نزود العدد فى السوق!

عبد الناصر: خلاص يبقى على طول أمنع التقسيط.

صدقى: كمان ممكن نرفع السعر، يعنى أسعارنا دلوقتى الحقيقة تعتبر واطية قوى.

سرى للغاية

عبد الناصر: يعنى ناغى التقسيط فى الثلاثه ونلغى التقسيط فى التليفزيون؟

صدقى: هو بس مشكلة اللى دفع من ثلاث سنين أرد له فلوسه وبعدين يعنى...

الشافعى: متهيألى ده تعاقد قانونى.

صدقى: يعنى بيقولوا إنه ده أنا متعاقد أولاً على شراء العربية دفعت مقدم، طبعاً مفروض إن احنا أخذنا فائدة على الفلوس بتاعته طول المدة اللى فاتت، أما آجى أقول له: لأ.. أنا حارجع لك فلوسك النهارده يبقى شكلها يعنى...

أبو النور: هم كام واحد يعنى؟

صدقى: لسه ٤٠٠٠ واحد.

القيسونى: بالنسبة للعريبات اللى تعاقدوا يقدرنا ياخدوا كل انتاج المصنع للسنة الجاية.

صدقى: ماهو موقفين وبنسلم كل الحجوزات، يعنى الـ ١١٠٠٠ خلاص خلصنا، الـ ٢٣٠٠٠ يمكن على آخر السنة دى، الـ ١٣٠٠٠ الحجز الأولانى برضه يخلص على آخر السنة دى، لكن الحجز الثانى يبقى لسه.

أبو النور: اللى دافع cash اللى حاجز ودافع cash يديله.

عبد الناصر: الـ ١٣٠٠٠ تقراًوا إعلانات الأهرام بتاع ١٩٠٠ جنيه مستعملة!

صبرى: بيعملوها تاكسى.

عبد الناصر: التليفزيون بيتباع فى الاعلانات المبوية بأكثر من..

صبرى: بـ ١٦٠ جنيه، ١٦٠ جنيه بيعوه.

سرى للغاية

صدقى: فيليبس بيتباع بـ ١٨٠٠ جنيه.

القيسونى: ماهو مجلس الأمة قال: إن احنا بنبيجى على نفسنا ويندى الأرباح للناس الوسطاء يعنى...

عبد الناصر: آه.. هو ده الحقيقة الموضوع اللي انتاجنا فيه أقل من الطلب، لازم نرفع السعر ونمشى.

صدقى: ونبيع بالنقد، هى بس السيارات يعنى الحقيقة سيادتك تأمر هل نرجع الفلوس ولا نمشيها؟

عبد الناصر: وترفع السعر؟

صدقى: يعنى أفرض رسم عليها - زى الدكتور القيسونى مايقول - وده يبقى يروح للحكومة، إنما

اللى مقسط وبقه يعنى ما أصل الحقيقة دافع فلوسه بقى له ثلاث سنين مثلا!

عبد الناصر: ودلوقتى انتوا موقفين الحجز؟

صدقى: موقفيه خالص.

عبد الناصر: وأنا رأيى نلغى عمليات الحجز دى كلها؛ لأن عمليات الحجز برضه عمليات ضد النظام!

ليه؟ بيروحو الناس ويحجزوا ولا بياخدوش يعنى!

صبرى: وقفنا الحجز بالنسبة...

...: هو فى العربيات بس.. فى العربيات الحجز دفع..

عبد الناصر: آه.. لكن وقفنا؟

صدقى: من ساعة سيادتك ما أمرت.. مافيش بنسلم لقدام يعنى.

سرى للغاية

عبد الناصر: هو السعر هو اللي عايز..

صدقى: نفرض رسم ١٠٠ جنيه على كل سيارة أو ٢٠٠ جنيه على كل سيارة.. ممكن يعنى؟

عبد الناصر: آه.

محي الدين: إيه المانع يعنى؟

القيسونى: هو مقترح حوالى ٢٠٪.

صدقى: منه ٢٠٠.

عبد الناصر: يعنى دلوقتى بالنسبة لسلفيات البنوك بتمشى؟

القيسونى: بتمشى، بس مش زى زمان احنا قلنا للبنوك نخفض شوية.

عبد الناصر: لأ.. يعنى أنا باتكلم عن سلفيات البنوك.

القيسونى: اللي على الماهيات، هى ثلاث شهور على سنة.. ثلاثة أشهر على سنة على المرتب.

عبد الناصر: لا.. بياخذ شهر؟

أبو النور: لا.. بياخذ ثلاثة.

القيسونى: أصل إحنا محددين المبلغ، يعنى كان حوالى ٤ مليون جنيه وكانت الخزانة بتودع وديعة فى

البنوك المختلفة يعنى، والبنوك بتسلف ضعف هذه الوديعة.

عبد الناصر: بيدوا ثلاث أشهر؟

أبو النور: أيوه.. على سنة فى حدود ثلاث أشهر.

سرى للغاية

عبد الناصر: نعملها شهرين.

أبو النور: آه.. ممكن شهرين.

عبد الناصر: أنا رأيت ثلاث شهور كثير قوى على الواحد يسدها بعد سنة، يعنى أنا فاهم إنها شهر!

أصوات: هو كانت زمان شهر.

القيسونى: هو شهر يعنى ممكن يخدم عدد أكبر من الناس.

عبد الناصر: يعنى شهر معقول، فى حدود شهر يدفع ١ على ١٢ من ماهيته زائد الفائدة؛ حايدفع واحد على عشرة من ماهيته، ف شهر معقول. هو دلوقتى عمر أفندى بيدى أد أيه؟

استينو: ثلاث أشهر برضه يافندم.. ثلاث أشهر فى أقسام، لكن عنده طريقة إن فيه البنك ويتحول الماهيه للبنك وبيخصم القسط، وعلى ذلك بالطريقة دي...

عبد الناصر: ثلاث أشهر كثيرة.

استينو: كثيرة.

عبد الناصر: يعنى أنا برضه فاهم إن العملية شهر!

أصوات: بالنسبة لى شهرين، بالنسبة لعمر أفندى شهر بالنسبة..

القيسونى: متهيألى تقسيط شهر التليفزيون والحاجات السلع المعمرة.

أصوات: لأ.. والله ما إحنا قلنا دي مافيش تقسيط.

سرى للغاية

القيسونى: أيوه.. إنما مش محتاجين يعنى..

استينو: اللي بيجوزوا بناتهم يعنى هى صعب.

أبو النور: واللبس.. يعنى اللبس اللي عنده ١٢ جنيه حايبقى بـ ٢٤ جنيه!

عبد الناصر: والأوكازيونات تمشى، يعنى الحقيقة عمليات أصلها...

استينو: أصلها اختياري، كمان يعنى مش كل المحلات؛ جزء بيعمل أوكازيون وجزء مايعمش.

الشافعى: طلعت النهارده فى الجرائد ممنوع الأوكازيونات.

أصوات: ردوا عليها بكره بأوكازيون! (ضحك)

عبد الناصر: يعنى هى دى الحقيقة عمليات أصلها بتمس علاقات الناس، ومانقدرش أبدا نغيرها!

القيسونى: يعنى سلف البنوك فى حدود مرتب شهر، والتقسيط فى حدود مرتب شهرين، وإلغاء التقسيط بالنسبة للسلع المعمرة.

عبد الناصر: ها؟

القيسونى: يبقى فاضل لنا ٧,٥ مليون، هل سيادتك يعنى ترى مثلا إننا ناخذها عن طريق ضريبة سجاير، ولأ ناخذها بقى عن طريق مجموعة من الاقتراحات المختلفة؛ يعنى مثلا التليفونات.. كان فيه اقتراح من الدكتور مصطفى إن زيادة التعريفه بتاع التليفونات بتجيب حصيلة ٣ مليون جنيه، وبعدين فى لجنة الخطة كانوا وافقوا على بعض أجزاء منها بتجيب مليون جنيه لو مشيناها كلها حاتجيب ٢ مليون جنيه إضافي، وبعدين البريد..

عبد الناصر: لأ البريد مايمشيش.. البريد ده أصله عملية يمس...

محي الدين: التليفزيون ١٠ جنيه.

سرى للغاية

عبد الناصر: نزود يعنى العربيات.

القيسونى: ١٠ جنيه على الجهاز و ٢٠٪ رسم انتاج على السلع المعمرة.

عبد الناصر: حايزيد عن كده.

القيسونى: حايزيد التليفزيون عن ١٠٪ حسب الكلام.

صدقى: هل نفرضها رسوم ولا نرفع الأسعار؟

...: نرفع السعر.

صدقى: أصل برضه الرسم بيلحق صورة بالدولة.

...: لا أبدا بالعكس نرفع السعر.

صدقى: نقدر نرفع الأسعار يافندم، والعملية تمشى ما حد يحس بيها ولا يتكلم.

عبد الناصر: آه.

صدقى: ويبقى ناخذ إجراء بقى مع الخزنة؛ إن زيادة الحصيلة تروح الخزنة.

أصوات: آه.. يبقى معروفة ان حاتروح الخزنة.

القيسونى: برضه زيادة الرسم يعنى؛ لأن التحصيل من قطاعات أحيانا يكون مش...

...: مش بيدفع؟

سرى للغاية

صدقى: والله يافندم إحنا اللى مابناخدش من الخزانة اللى لينا عندهم، لأ.. أنا رأيتى الناحية النفسية، يعنى الحكومة ماقررتش رسوم.

القيسونى: ماإحنا لازم نواجه الناس ونقول لهم.

صدقى: ماإحنا حانرفع السعر حانرفع السعر، ونجيب لك الحصيلة.

معى الدين: التليفزيون لما نرفعه ١٠ جنيه كمان نجيب ١٥ مليون تانيين.

صدقى: هو أصله مش مسعر، أنا أقدر أرفع سعره طبيعى.

معى الدين: يعنى ٢ من التليفونات، ١,٥ كمان من التليفزيون؛ أدى ٣,٥ من الـ٧,٥.

عبد الناصر: التليفزيون بكام؟

حاتم: ب٧٥ دلوقتى الصغير يافندم اللى هو ١٤ بوصة.

صدقى: ٢٣ بوصة بكام ياحاتم؟

حاتم: ب١١٠.

صدقى: إحنا عندنا ١,٥ زى ماسيادتك ذكرت إن فيه فرق ٥ جنيه، نقدر نرفعه لـ١٢٠ جنيه بالراحة يعنى.

حاتم: بس إذا كان ١٤ بوصة نخليه على ٧٥ لأن لو زدنا ١٠ حايبقى ٨٥ وفيه ناس الحقيقة
غالبه جدا بيشتروا التليفزيون.

صدقى: خليها ٨٠.

سرى للغاية

حاتم: فعلا ٨٠ والغنى اشترى.. الأغنياء كلهم اشتروا.

صدقى: ماتفرقش ٧٥ من ٨٥ يا حاتم.

حاتم: لأ.. ٨٥...

خليل: الاقتراح الخاص بعدم الجمع بين بدلات الحضور بما فيه بدل التمثيل، فيما يزيد عن ٥٠٠ جنيه.

عبد الناصر: نعم؟

خليل: الاقتراح الخاص بعدم الجمع بين بدلات الحضور فيما يزيد عن ٥٠٠ جنيه شهريا، دى مش داخله.

معى الدين: تانى.

...: أنا باتكلم عن مشروع لجنة الميزانية هنا اللي وافقت عليها لجنة الخطة والميزانية فى مجلس الأمة.

أبو النور: والله كنا اتفقنا عليها دى بتجيب مليون وشويه.

خليل: ١,٢٠٠,٠٠٠.

القيسونى: هم بحثوها دى أفكر فى الميزانية، فيه قانون بإمكان الجمع.. وضع معين.

أصوات: لا.. لا.. أبدا.. تطبيق قرار، مافيش حاجة من دى.

صبرى: فيه قرار من رئيس الوزارة.

عبد الناصر: فيه تفكير بالاعتمادات المكافآت التشجيعية الى النصف.

سرى للغاية

القيسونى: اللجنة رفضتها، يعنى الحكومة كانت متقدمة بها ولجنة الميزانية رفضتها، ويقولوا مافيش حوافز كافية للانتاج.. الموظفين وبتاع خصوصا بتوع الشركات. يعنى مثلا واحد زى الأخ نزيه أمين ولا جعفر بتاع شركة النحاس يعنى قالوا: دلوقتى الترقية بالأقدمية ومافيش حوافز كافية؛ نخلي المكافآت التشجيعية.

خليل: بس دى ماكانتش فى الشركات.. فى الحكومة.

...: إذا زاد الانتاج.

خليل: الشركات مش داخله.

القيسونى: الحكومة مطبقينها كمان.

خليل: الشركات مش داخله.. الحكومة بس.

القيسونى: يعنى مانقدرش نطبق على الحكومة بس ومانطبقش على الشركات!

خليل: الـ ١,٨ كانت فى الحكومة.

عبد الناصر: ١٦ (ثم قرأ السيد الرئيس التالى: تخفيض المكافآت التشجيعية للنصف، وعدم السماح بالجمع بالبدلات المختلفة فوق ٥٠٠ جنيه فى السنة).

...: هى دى نعملها؟

عبد الناصر: انت.. تخفيض وزن عبوة الشاي بيدى ٣ مليون، وتطبيق التقدير الجديد لضرائب الأراضى الزراعية بيدى ١,٥ مليون. وبعدين زيادة سعر الكسب وزيادة سعر السماد، وزيادة أسعار السلع المعمرة؛ اللي هو السيارات ٢٠٪ والثلاجات ١٠٪ وتكييف الهواء ٢٠٪ والتليفزيون ١٠٪، وممكن التليفزيون نزوده ٢٠٪، وبعدين تعديل تعريفه التليفونات.

سرى للغاية

القيسونى: هل الأدوية حاننظر فيها؟

عبد الناصر: دى عايزه دراسة.. موضوع الأدوية عايز دراسة، يعنى إيه أنا أفضل أرفع السعر عن إن السلعة تضيع من السوق؛ لأن دلوقتى الأدوية بتتهرب لليبيبا وتتهرب للبنان!

القيسونى: الأدوية المستوردة؟

عبد الناصر: هى بالذات الأدوية المستوردة هى اللى بتتهرب؛ لأن أسعارها أقل من لبنان، فدى عايزة بحث جدى.

القيسونى: وأقل من جهة الانتاج.. يعنى الأدوية السويسرية هنا أرخص من سويسرا.

...: والانجليزية برضه.

القيسونى: لأن عمولة التوزيع هنا خفضت خالص.

...: خفضت تخفيض ٢٥.

معى الدين: دلوقتى إعادة النظر فى ضرائب الأطوان كل ١٠ سنين يعنى تمشى من السنة دى أظن؟ هى يمكن دى مش مكتوبة هنا.

عبد الناصر: ١,٥ مليون.

معى الدين: مش مكتوب هنا.

صبرى: مافيش داعى.

أبو النور: يعنى مادام إحنا زودنا الكُسب والسماذ والبتاع مالهاش داعى.

سرى للغاية

صبرى: بتجيب ١,٥ مليون ولازم تمشى الحقيقة.

القيسونى: إحنا إذا سكتنا يعنى لغاية بعد ديسمبر حاتمشى.

أبو النور: بس هى ١,٥ مليون بس، دى هى فى ضريبة الدفاع نسبة منها؛ علشان حانتوالى وراها زيادات مش دى بس.

...: ده غير التأخير.

أصوات: والرسوم والكلام ده كله.

عبد الناصر: ندى نصف على الحجز.. يعنى الـ١,٥ مليون حايديلك ثلاثة أرباع مليون.

...: حايدوا ضريبة دفاع ١٥%.

القيسونى: هيه كان التقدير إنها بتزود ٢٣% عن مستوى الضرائب اللى كان سائد قبل كدة.

عبد الناصر: إنت اللى باعت لى.. إنت اللى ماضى الورقة اللى قدامى دى اللى أنا أقرأ منها! (ضحك)

...: يمكن على الضريبة نفسها؟

عبد الناصر: ها؟

...: ضريبة العمل.. الضريبة نفسها.

عبد الناصر: لأ.. تطبيق التقدير الجديد لضرائب الأراضى الزراعية بيدى ١,٥ مليون.

...: يبقى عليها زيادة الدفاع وزيادة الرسوم.

سرى للغاية

.... : حاجيب كثير؟

صدقى: هو من الناحية العامة يافندم المبلغ اللى فاضل مطلوب تدبيره سبعة مليون جنيه؛ مثلا فرض قرش صاغ على السجاير ببيجى ٧ مليون جنيه بدلا من إن احنا نطلع ٤ . ٥ إجراءات علشان نجيبهم. يعنى لما يطلع ٤ . ٥ حاجات عدد الناس اللى بيتأثروا بها بيبقى كثير، بينما السجايرأهو بيبقى موضوع واحد وبيخلص.

عبد الناصر: هه؟

صدقى: وبيجيب الرقم، يعنى لما برضه نبيجى ن فكر فى التليفونات وفى الأدوية - وده علشان نلم السبعة مليون جنيه - متهيألى ببقى أثرها النفسى أوحش مما لو فرضنا قرش على السجاير.

عبد الناصر: لأ.. هو التليفونات مليون أحسن من ثلاثة، والسنة الجايه نبقى نزود يعنى مليون.

صبرى: بس بتاعة الأطيان دى لازم تمشى من ناحية العدالة.

عبد الناصر: لأ.. الأطيان بتمشى.. يعنى بتمشى.

صبرى: تحسين أراضى نتيجة استثمارات.

خليل: بس إذا سمحت يافندم المليون ونص...

عبد الناصر: نعم؟

خليل: نقدر نعمل التليفونات بدون مانرفع التعريفة.

عبد الناصر: نعم؟

سرى للغاية

خليل: يعنى بدل مانرفع التعريفه نقدر نعملها بدون مانرفع التعريفه.

عبد الناصر: إزاي؟

خليل: حاندد مدة المكالمه من غير ما...

عبد الناصر: تغالطوا يعنى! (ضحك)

أصوات: يقطع الخط.

خليل: بنعمل تجربه دلوقتى إن الناس بتتكلم كثير مُدد، بدل مايبشغلوا الخطوط ابتدينا نحط جهاز اللى هو بيقطع المكالمه بعد مثلا ١٢ أو ١٥ دقيقه.

أبو النور: أوم يضطر يطلب تانى!

خليل: فيطلب تانى تبقى مكالمه زياده فبدل مانرفع التعريفه.

عبد الناصر: أهو.. أنا كل يوم أشتم فتحى رضوان! (ضحك) لأن وزير المواصلات لسه فتحى رضوان قاعد كنت باتكلم وانقطعت المكالمه ثلاث مرات!

...: كانوا بيجربوا بقى الجهاز.

عبد الناصر: بيجربوا بقى! (ضحك)

...: أصل عملية القطع دى مهمه تبين...

خليل: يعنى هى بتاخذ ١٥ دقيقه، وبعدين يحسب مكالمه زياده بتجيب مليون جنيه بدل مانرفع التعريفه.

عبد الناصر: طيب لما حاترفع حاترفع أد إيه يعنى كام فى المائه، علشان تجيب الثلاثه مليون؟

سرى للغاية

خليل: كنا حانرفع بسيط يعنى مش كتير.. يعنى كنا حانرفع على المحلات التجارية، وكنا حانرفع فى خطوط الترنك، وكنا حانعمل تعريفه تقريبا.

عبد الناصر: مش على المدة.. مش على المكالمات العادية يعنى؟

خليل: لأ.

عبد الناصر: طيب ماتمشى دى.

القيسونى: دى اللى إعترضوا عليها بالذات المحلات التجارية، كان الاقتراح بتاعها بدل ٨٠٠ مكالمه بقرش صاغ نعملها ٣٠٠ بس بقرش صاغ ومازاد عن ٣٠٠ نرفع! هما معترضين على كده.

أبو النور: ليه بقه؟ أولا.. ده تجارة.. ده تجارة.

القيسونى: لجنة الميزانية فى مجلس الأمة بيقلوا: الناس دول زدنا عليهم أعباء.

أبو النور: ده تجارة، هو بياخد الفلوس من اللى بيتكلم.. هو بيدفع حاجة من جيبه؟! هو بتاع السجاير..

عبد الناصر: مش فاهم ليه؟

القيسونى: يافندم دا العجز ٣٠ مليون، وقلنا تناقشه مع لجنة الميزانية.

عبد الناصر: لأ.. يعنى أنا رأى فى حاجات اللى هى بنمشيها من غير مجلس الأمة، وبعدين الحاجات الباقية هى اللى بنتكلم فيها مع مجلس الأمة. يعنى موضوع التليفونات مش بتاع مجلس الأمة، وموضوع الأرض برضه مش بتاع مجلس الأمة، ولا موضوع تخفيض المكافأة التشجيعية بتاع مجلس الأمة؛ لأنه مش عايز قانون. يعنى أنا بأناقش اللجنة فى المواضيع اللى عايزه قانون بس، اللى هو المواضيع اللى أنا بأخذها كسلطة تنفيذية، يعنى مافيه داعى إنى أتكلم معاه فيها.. مش كده والا إيه؟!!

سرى للغاية

صبرى: هم بس كان فيه الفكرة يعنى..

عبد الناصر: هم بقى إيه أصل أى حاجة حاتقولها لهم حايقولوا لك لأ!
القيسونى: ماهى كانت الفكرة فى إن إذا كنا حانطالب منهم حانوجد...

عبد الناصر: بعد ما إذا قالوا لك لأ حاتعمل ولا ماتعملش!؟

صبرى: يعنى ده كلام فى اللجنة يعنى مش...

عبد الناصر: طيب يعنى بيبقى التكتيك ردى.. إنك تودى حاجة الواحد يقول لك عليها لأ، وبعدين إذا كنت حاتعملها تكتيكيا يعنى إعملها وقدمها، ماتقولوش رأيك إيه.. أقول له تقرر بحيث انه مايقولكش لأ، لأنه بعد مايقول لك لأ وبتعملها، بيبقى ال reaction جوه المجلس.. إحنا قلنا: لأ.. وعملوا وسووا!

خليل: دى نقطة مبدأ لأن همه تدخلوا. كنا بنتكلم فى الحكاية دى فى المجلس، ابتدأوا يشعروا إنهم حتى فى زيادة أسعار المنتجات عايزين يدخلوا فيها!

...: أيوه.

خليل: ده فى الأرز أثاروا الرز ومبدأ عمل العملية، بينما كل شىء لو كان فى سلطة الحكومة هى بتعملها.

صدقى: يعنى حسب القانون يافندم إحنا لينا حق تسعير المنتجات الصناعية، أنا دلوقتى مش قادر أرفع الأسعار لأن هم مفترضين إن أى رفع سعر ده كأنه رسم جديد على الناس، ويجب يحصل على موافقة مجلس الأمة!

القيسونى: وده مبدأ خطير!

خليل: مبدأ خطير!

سرى للغاية

عبد الناصر: يعنى انتوا اللى بتدوهم هذا الـ...

صبرى: هو موضوع الأرز لأنه كان فيه رفع يد شكلية..

خليل: بس أنا باقول من ناحية المبدأ بيتبدأوا..

صبرى: لكن طبعا ماأديهمش.

عبد الناصر: يعنى إحنا بنكلمهم فى المواضيع اللى عايزة قوانين، الموضوع اللى مش عايز قانون يبقى مسئولية السلطة التنفيذية، وإلا بهذا بياخذ حق مش بتاعه!

القيسونى: إحنا كنا بنقول لهم: يعنى دخلنا فى الموضوع ده على أساس إن مقابل إنهم يقترحوا الإدخار أو ضريبة أو بتاع، إحنا كحكومة يعنى أفضل.

عبد الناصر: أنا رأيت العملية تكتيكيا كلها غلط، ليه بقى؟! أما بتروح لمجلس الأمة يعنى عملية برلمانية غلط، تقول له أنا عندي عجز ٢٧٪ دبره لى. الحقيقة إنت سبيت ال initiative وإديتها لمجلس الأمة، كل واحد حايرمى الكرة على التانى؛ حاتقول له كذا بيقول لك لأ.. تقول له كذا بيقول لك لأ! العملية عندي عجز ٢٧ مليون، بالقرارات التنفيذية بأخذ كيت وكيت بيفضل ١٠ - ١٥ مليون.. أدى اقتراحاتى كيت كيت كيت ثلاثة اقتراحات، ولا أتنازل عنها.. بيصوتوا ضدها بيروحوا يعنى!

خليل: والله كده يافندم.

عبد الناصر: يعنى عملية كده، هو يعنى عملية يعنى زى مولتج ولا داخل معاه أغلبية ثلاث أصوات وداخل بضرائب على الدنيا كلها، مايقدر!

.... كالنيجر.

سرى للغاية

عبد الناصر: كالنيجر مايقدر واحد..

أبو النور: الحديد والصلب.

عبد الناصر: لأ.. على الضرائب اللي نازلين بيها كلها ضرائب، لكن الحزب مضطر إنه يفرضها وإلا بتسقط الحكومة.

صبرى: هو كل حاجة بتمشى يعنى.

عبد الناصر: آه.. يعنى عملية، فى رأى عملية إيدار يوم بيبقى ٧ مليون جنيه، تخفيض اعتمادات المكافآت التشجيعية للنصف ١,٦ مليون جنيه، تخفيض بدلات التمثيل ٦٠٠,٠٠٠ جنيه، عدم السماح بالجمع بالجمع ١,٣٠٠,٠٠٠ جنيه، تخفيض وزن عبوة الشاي ٣ مليون جنيه.

القيسونى: يمشى الشاي؟

عبد الناصر: آه.. تطبيق التقدير الجديد لضرائب الأراضى الزراعية ١,٥ مليون، بعدين زيادة سعر الكُسب جنيه واحد للطن مليون. لأ.. دلوقتى هو بيقولوا لأ.

أبو النور: الكُسب ٢,٥ مليون.

عبد الناصر: يبقى الكُسب ٢,٥ مليون، زيادة سعر السماد ١٠ قروش للشوال ٢ مليون جنيه، زيادة أسعار السلع المعمرة ٢٠٪ للسيارات، ٢٠٪ للثلاجات، ٢٠٪ تكييف الهواء، ٢٠٪ للتلفزيون، مافيش على الراديو أصلا انتم كنتم عاملين ده ٣,٥ مليون حاطين فيه الراديو!

صبرى: أيوه.

عبد الناصر: ومتهياىلى ٣,٥ مليون بدون راديو بيمشى.

صبرى: على التلفزيون.

سرى للغاية

عبد الناصر: هه؟

صبرى: ٣ مليون التليفزيون.

عبد الناصر: لوحده؟

صبرى: أيوه يعنى ٢٠٪ يجيب ٣ مليون.

أصوات: ٢٠ جنيه.

صبرى: ٢٠ جنيه؟

الشافعى: ١٠ جنيه بيبقى و ٢٠ جنيه ٣ مليون.

عبد الناصر: تعديل تعريف التليفونات.

معى الدين: مكتوب هنا الـ ٢٠ بتجيب ٢,٥.

أصوات: ٢٠٪ للمعمرة.

عبد الناصر: فين ده؟

معى الدين: موجودة هنا فى آخر الصفحة قدامى ٢,٥ .

عبد الناصر: آه.. غير التليفزيون، حاطط التليفزيون ١,٥؛ ١٠ جنيه زيادة فى سعر جهاز التليفزيون ١,٥ مليون. بتخلى ٢٠ جنيه زيادة فى سعر جهاز التليفزيون حاتعمل ٣ مليون جنيه أو تخلى ١,٥ جنيه؟

سرى للغاية

أصوات: ١,٥ .. ١,٥.

القيسونى: يعملوا ٢,٢٥ مليون يعنى.

صدقى: ٢٠ على الكبير و ١٥ جنيه على الصغير يافندم.

...: يبقى متوسط.

عبد الناصر: يبقى ٢٠ على الكبير و ١٠ على الصغير حاجيب ٣ مليون، بعدين ٢٠٪ على السلع المعمرة ماعدا الراديو.. يعنى ماتعتبروش الراديو داخل فى العملية بيبقى ٢,٥ مليون، والبطاريات كمان.. والبطاريات؟

القيسونى: البطاريات بنفرض عليها؟

عبد الناصر: لا .. لا.

القيسونى: نستثنيها.

عبد الناصر: بعدين زيادة فى تعريفه التليفونات ٣ مليون جنيه.

صبرى: حانعملها مليون بقة.

عبد الناصر: ثلاثة.

صوت: آه .. ٢,٨.

عبد الناصر: يعنى اللى مش عايز قانون ده بيطلع بيه قرار على طول، بيطلع كام؟

خليل: هل سيادتكم تسمح لى أراجع بالنسبة للبريد؟ سيادتكم تسمح.. إحنا كنا نفتكر إن احنا نعمل

الظرف وعليه ورقة البوسته يعنى مش كنا حانزود؟

سرى للغاية

عبد الناصر: آه؟

خليل: يعنى علشان مايسرقوش الطابع بأطبعها على الظرف.

عبد الناصر: هه؟

خليل: ونبيع الظرف بورقة البوسته.

أبو النور: بيع الظرف بورقة البوسته ويكسب منه.

عبد الناصر: بالاضافة الى ورقة البوسته لوحدها ولا لأ؟

خليل: فيه كده وفيه كده.

عبد الناصر: يعنى يبقى ورقة البوسته لوحدها بقرش تعريفه وقرش صاغ، ولا بتبقى ايه؟

خليل: سيادتك حانلغى اللى بقرش صاغ ونبيع الظرف مطبوع عليه ورقة البوسته بثلاثة تعريفه، كأنى بأعطى ظرف بورقة البوسته بثلاثة تعريفه.. بنزود.

أبو النور: نخلى كده وكده.

عبد الناصر: بلاش.. أنا بالذات مش موافق على ورقة البوسته.

صبرى: عندنا ٢,٤ مليون فائض.

عبد الناصر: فرض رسم على البيرة بـ ٢٠٠,٠٠٠، برضه ده كان فى الـ...

صدقى: برضه نفرض رسم ولا بنرفع السعر؟

سرى للغاية

عبد الناصر: افرض رسم يعنى.

صدقى: أصل الرسوم عايزه بقى قرار من المجلس، لكن فلوس التليفزيون والحاجات دى حانعملها رسم ولا حانعملها...

صبرى: لأ.. دى رفع.

صدقى: رفع أسعار.

عبد الناصر: يعنى أنا رأيت نرود أسعار وإلا ندخل فى نفس المناقشة بتاع السنة اللي فاتت بتاع مجلس الأمة. وبعدين نخلي دى بعد الميزانية ماتخلص وكل حاجة، وناخد بعضنا.. يعنى بنحطها، يكتب فى الميزانية موارد أخرى بند اللي هو السلع المعمرة دى اللي هو العملية، وبيقول لهم إن أنا حأوفر مواردها.. والا إيه؟

صبرى: أيوه.

عبد الناصر: وبعدين يبقى كل اللي احنا عايزينه من مجلس الأمة؛ قانون واحد بإدخار نص يوم.. مش كده؟ ولا ناخذ ضريبة على السجاير ولا حاجة.

أصوات: كويس قوى.

حاتم: ولو شلنا الشاى من العملية دى كمان يبقى أحسن؛ لأن الحمل بتاع كل يوم الناس برضه بتتضايق منه.

عبد الناصر: هو الحقيقة تخفيض وزن عبوة الشاى الغرض منه تقليل الاستهلاك.

حاتم: ١,٦ مليون زيادة على كمية الشاى، يعنى الناس كلها بنقول مارجعناش للأسعار ٦١!

.... يتوقف على نغطة الناحية السياسية.

سرى للغاية

عبد الناصر: نلغى الشاى؟

أصوات: نلغى الشاى.

حاتم: كله بيقول أسعار ٦١.

عبد الناصر: خلاص نلغى الشاى.. بلاش الشاى.

صدقى: والله إذا سمحت سيادتك الأدوية، هو الاقتراح كان تخفيض العبوة.. الدواء اللى فى العبوة، وده ميزته إنه بيحصل Waste فى استخدام الدواء وبيوفر.

عبد الناصر: هيه أصلا الأدوية جايه معبأه من الخارج.

صدقى: لأ.. ده هو نسبة البيع المحلى ١٦ مليون والمستورد ٨ مليون.

عبد الناصر: وأنا رأيى الأدوية نعمل لها دراسة يعنى تعملوا لها دراسة ونشوفها، نلغى الشاى.

استينو: بس والله الشاى مافيش داعى، هو داخل فى الميزانية سلع أخرى حانرفع أسعارها، على أساس أن خفض تكاليف المعيشة تقدر ٣٥ مليون جنيه، لا تكفى إلا باجراءات كنا ناقشناها فى لجنة الخطة؛ منها رفع سعر الذرة ورفع سعر الدقيق الفاخر والعيش الأفرنجى والمكرونه والحاجات دى كلها، وإلا الـ ٣٥ مليون ماتكفيش. فأنا شايف يعنى إذا كنا حانرفع سعر الذرة وحانرفع سعر العيش، يبقى الشاى بالمره.

القيسونى: لأ.. هو الذرة والعيش انتهوا، يعنى الدقيق الفاخر هو اللى بنرفعه.

استينو: ماهو الدقيق الفاخر لوحده بتاع ١٠ . ١٢ مليون جنيه.

القيسونى: طيب ٧٪.

سرى للغاية

استينو: لإن احنا دلوقتى بنخلط العيش البلدى بدقيق فاخر، مش حانخلطه وحانطلع رغيف عيش خاص بسعر مرتفع، ويعنى حانشوف حاتمشى إزاي؛ لأن جايز يبقى فيه رد فعل يقل الاستهلاك من الحاجات دى ويرتفع الاستهلاك من العيش البلدى الرخيص.

عبد الناصر: ده أصله فى السكة يعنى خفض تكاليف المعيشة.

استينو: لكن حانبندى نرفع الأسعار من أول الشهر الجاي.

عبد الناصر: نرفع أسعار إيه؟

استينو: الدقيق الفاخر.

عبد الناصر: إحنا حانناقش التقرير بتاعك بتاع التموين دلوقتى.

استينو: علشان خفض تكاليف المعيشة.

الشافعى: علشان الميزانية.

عبد الناصر: يبقى بلاش الشاى.

صبرى: بلاش الشاى.

القيسونى: يبقى إيدار يوم ٧ مليون، وبعدين إيدار نص يوم، وبعدين بدل التمثيل نخفضه ٢٥ جنيه، يعنى والمكافآت يبقى ٧٠٠,٠٠٠، والمكافآت التشجيعية وعدم الجمع ١,٢٠٠,٠٠٠.

عبد الناصر: المكافآت التشجيعية ١,٦٠٠,٠٠٠، عدم الجمع ١,٣٠٠,٠٠٠، بعدين التقدير الجديد لضرائب الأراضى الزراعية ١,٥٠٠,٠٠٠ وبعدين زيادة سعر الكُسب.

القيسونى: عن الضرائب الزراعية أصل ١,٥٠٠,٠٠٠؛ علشان حايطبق على نصف سنة.

سرى للغاية

عبد الناصر: آه.. يعنى ابتداء من ديسمبر زيادة سعر الكُسب ٣ مليون؟

القيسونى: ٢,٥ مليون.

عبد الناصر: ٢,٥ مليون، زيادة سعر السماد ١٠ قروش للشوال ٢ مليون، زيادة أسعار السلع المعمرة كام؟

القيسونى: ٢,٥ مليون.

عبد الناصر: ٣,٥ عندى.

القيسونى: علشان حانستبعد الراديو والتليفزيون حانخطه لوحده.

عبد الناصر: آه.. يعنى هو والتليفزيون؟

القيسونى: ٤ مليون، التليفزيون حايبقى ٢٠ ، ١٠.

عبد الناصر: تعديل تعريفه التليفونات ٣ مليون ، فرض رسم على البيرة ٢٠٠,٠٠٠.

القيسونى: بعدين تحصيل متأخرات ضرائب الأطنان.

عبد الناصر: آه.

القيسونى: ٢ مليون، يعنى مانمشيش فى مشروع القانون اللى كنا بعتناه لمجلس الأمة؟

عبد الناصر: بتاع إيه؟

القيسونى: اقتراح بأننا نقسط ضرائب الأطنان المتأخرة.

عبد الناصر: الفلاحين حالتهم كويسة.

سرى للغاية

أبو النور: بس التقسيط ده لازم.. مش حانقدر ناخذ إلا بالتقسيط، ماإحنا مشينا فيها فعلا.

عبد الناصر: ها.

أبو النور: يعنى فيه متأخرات حوالى ٨٠ مليون، مستحيل الناس حانقدر تدفع الثمانين مليون مرة واحدة، فأحنا قلنا: إنا بنعملهم على أربع سنين؛ على أساس أنه بيدفع ٢٠ مليون كل سنة، وفى هذه الحالة بنيسر لهم وهمه يقدروا يدفعوا.

القيسونى: بس متأخرات ضرائب الأطيان دى خمسة مليون، فأحنا بنقول نحصل منها ٢ مليون يعنى وبلاش القانون ده.

أبو النور: هو مش ده بس، ده هو ده مع بتوع بنك التسليف.. الاتنين.

القيسونى: بنك التسليف ماهى مشيت من السنة اللى فاتت.

أبو النور: لأ.. مشيت على جزء وجزء لأ.

القيسونى: حانطبقها كمبدأ يعنى لما نطبق التسويق التعاونى، وبندى المزارعين فروق التحسين والارفع الأسعار، نبيجى كمان نؤجل سداد.

أبو النور: هو إحنا مش بنؤجل بنؤجل المتأخرات.. السداد لأ، بنقول له: بتاع السنة دى لازم يدفعه بالكامل، وبيدفع ربع المتأخر عليه.

القيسونى: زائد يأخ عبد المحسن فى الثلاث سنين اللى فاتت كانت المتأخرات ٤ مليون جنيه، فى سنة ٦١ وصلت ٤٤، وبعدين نزلت يمكن السنة دى لـ ٣٧.

أبو النور: حطينا الموضوع ده من الأول.

معى الدين: إزاي حاتاخذ منه ٨٠ مليون مرة واحدة!؟

سرى للغاية

أبو النور: مستحيل.

القيسونى: لأ.. دول ٣٦.

...: لأ كل القروض.

القيسونى: ٧٠ - ٨٠ مليون جنيه، ولكن تتجدد كل سنة المتأخرات منها يمكن من الخمسة وثلاثين فيه جزء أتأجل فى سنة ٦١، اللى هو نتيجة أيام محصول القطن.. ده ماينتكلمش فيه.. ده يمكن.

عبد الناصر: وده كان طلع به قانون به ده؟

القيسونى: وده طلع قانون به.

أبو النور: ماطلعش لغاية دلوقتى.

عبد الناصر: لأ.. القانون بتاع التسيط؟

القيسونى: بتاع ٦١؟ آه.. ماشى.

أبو النور: ماكانش لسه طلع.

القيسونى: لأ.. طلع.

عبد الناصر: ده طلع إن احنا كمان ماناخدش منهم ويندى إعانة وبتاع!

القيسونى: لكن بالنسبة لـ ٦٥ بالنسبة لـ ٦٤ عند تطبيق نظام التسيط التعاونى على بعض المحافظات، يعنى كان تقرر إننا نقسط المتأخرات، فدى طبقت بالنسبة لبعض المحافظات. والفكرة

سرى للغاية

دلوقتى هل نطبقها على المحافظات الثانية كمان ولا مانطبقهاش؟ لأن الحقيقة أنا كنت معترض أصلا على تطبيقها على المحافظات الأولى.

محي الدين: طيب ما نقدم المدة بدل ٤ سنين نخليها سنتين بس.

أبو النور: حاقول لسيادتك.

القيسونى: دلوقتى هم بيطلبوا إن مش نقسط المتأخرات لغاية سنة ٦٣ ولكن نقسط المتأخرات لغاية ٦٤، يعنى بدهم يقسطوا كمان سنة اضافية ويقسطوا على أربع سنين.

أبو النور: هيه العملية علشان نيسر للناس إنها تدفع، لابد إن احنا نقسط المتأخرات تقسيط معقول علشان تقدر الناس تدفع، خصوصا إنها سلفيات للبنك على الأموال الأميرية؛ على أساس انه بيدفع بتاع السنة دى بالكامل. يعنى ما عليه من سلفيات السنة دى بيدفعها بالكامل من المتأخرات، بيدفع منها الربع. هى دى الحالة الوحيدة اللي ممكن الناس فيها تدفع، وإلا الناس مايتدفعش فعلا بتبقى الفلوس زيادة عليها. يعنى إحنا حسبناها وجدنا إن الفلوس زيادة لدرجة إنه لا يمكن يدفع!

عبد الناصر: معقول الكلام ده، يعنى لازم يدفع السنة دى بالكامل ويدفع الربع معقول يعنى؛ لأن إذا دفعته السنة دى بالكامل..

أبو النور: مايقدرش يدفع.. خلاص بيبقى مايبدفعش كده ولا كده.

القيسونى: فيه ناس دلوقتى بتستلف من غير ماتكون عندها حاجة فعلا الى الاقتراض، طالما إن مافيش فائدة على..

عبد الناصر: لأ.. ماإحنا حانتكم على الفائدة دلوقتى، يعنى الفائدة من بنك التسليف لازم نعمل فائدة نعمل فائدة ٤٪ لمن تزيد حيازته عن ١٠ فدادين أو ٥ فدادين؛ بهذا الحقيقة نبقى Fair، أنا عارف ناس.. أعراف شخصيا ناس يعنى متأثرين.

سرى للغاية

القيسونى: بيستلفوا.

عبد الناصر: آه.. وهو ده اللى بيخلينى باقول هذا الكلام. والعملية طلعت استغلالية يعنى، ده بصرف النظر عن النظرية بتاع والكلام ده، ونخليها على خمس فدادين أو هي ١٠ فدادين متهيألى معقولة؟

أبو النور: نخليهم ١٠.. هي ١٠ معقولة.

عبد الناصر: يعنى ١٠ بندى بدون، فوق ١٠ بندى ٤٪، دى تدينا كام؟

القيسونى: نحسبها يافندم علشان حانحسبها على الحيازة مش على الملكية يعنى.

عبد الناصر: آه.. على الحيازة لأن الحيازة معروفة فى كل..

القيسونى: هل نقسط كمان متأخرات الضرائب؟ ضرائب الأطيان والا مش..

أبو النور: ماهو ده نفس الموضوع، هي بس امكانية الدفع هو ده الموضوع.

عبد الناصر: ها؟

أبو النور: المتأخر بينقسم على أربع سنين وييدفع بتاع السنة دى بالكامل، يعنى حسبناها لقيناها صعب جدا عليه إنه يدفع.. فخلاص بييلطج مايبدفعش.

القيسونى: يعنى إذا ماحصلناش متأخرات الضرائب أو قسطناها، وحانشيل الشاى كمان، وحاناخذ فى التقسيط.. نقصر التقسيط، الائتمان بتاع التقسيط بثلاثة مليون جنيه؟

عبد الناصر: مش فاهم!

سرى للغاية

القيسونى: يعنى دلوقتى التقسيط بنمون بالتقسيط يعنى حاجات بتاعة مثلا ٢٠ مليون جنيه، فنخليها
.١٧

عبد الناصر: آه.

القيسونى: ونستخدم ٣ فى تمويل الاستثمارات، وبعدين الضرائب الزراعية حانمشى قانون التقدير
الجديد؛ يبقى ١,٥ مليون.

عبد الناصر: يعنى مفروض تديك ٣؟

القيسونى: ٣ فى السنة الكاملة.

عبد الناصر: فى السنة آه.

القيسونى: نجيب ٢٨ مليون جنيه.

صبرى: جوائز الدولة.

عبد الناصر: آه.. تخفيض جوائز الدولة والا العلم.

القيسونى: ٥٠ ألف جنيه، هم عايزين ياخدوا مكاتب نواب الرئيس كمان نواب رئيس الوزارة يعنى!
(ضحك)

أبو النور: ويروحوا فين؟

القيسونى: أصل حاطين يعنى موجهين النظر إليه بتوع مكاتب نواب رئيس الوزارة ٣٠٠,٠٠٠ ألف
جنيه فيبقولوا: إن يعنى ينتدبوا من الوزارات وبلاش النظر للموضوع ده.

عبد الناصر: دلوقتى إنت مش عاوز ٢٧ مليون؟

سرى للغاية

القيسونى: ٢٩ مليون.. ماهى زادت تانى بعد...

عبد الناصر: بعد إيه؟

القيسونى: بعد التغيير ده هى زادت ٢ مليون جنيه!

عبد الناصر: طيب دلوقتى عندك كام؟

القيسونى: عندى ٢٨ مليون.. ماشية يعنى! (ضحك) لا.. ماأنا باقول يعنى: إنى أعترض على حكاية إلغاء مكاتب نواب رئيس الوزارة.

عبد الناصر: بيبقى الكل بقى عايزين نطلب قانون بالإدخار.

القيسونى: حانعدل مشروع الميزانية.. حاندخل تعديلات علشان نخفض بدل التمثيل والمكافآت التشجيعية؛ لأننا دخلناها بمبالغ معينة فحانعدلها.. حانقصها يعنى.

عبد الناصر: طيب والمهم الكلام اللى حايقال بالنسبة للإدخار وبالنسبة للثمان ساعات، نقول إيه؟! يعنى إحنا ببيان إن عملية الإدخار إن احنا بندخل قانون لوفرة الإدخار.. مش كده؟ بنقول: إن ببحث موضوع الإدخار والاكتفاء بنصف يوم إدخار للعاملين، وبنقول ان ده بيدى ٧ مليون جنيه، يعنى حاجة بسيطة يعنى ماهياش كبيرة.

أبو النور: ونقول إن احنا اديناها علاوة بقدر كده السنة دى.

عبد الناصر: بدلا من فرض ضرائب يعنى، وإن مشروع الإدخار ده كل واحد حا يكون له دفتر إدخار، وبعد مدة معينة يستطيع إنه يسحب من هذه الفلوس ويستلف عليها.

القيسونى: أو شهادة استثمار.

عبد الناصر: وليه فايده ولا مالوش فائدة؟

سرى للغاية

أصوات: ٥٪.

عبد الناصر: وحاكون له فائدة ٥٪، وهو عملية تأمين اجتماعية، وحايشرح الموضوع ده بالتفصيل. وإن الحكومة حاتتقدم بقانون بهذا مانقولس المجلس حايجتمع وتتقدم بقانون بهذا. وبعدين الموضوع الثانى بتقدير المبادرة اللى أظهرها العمال فى العمل ساعة اضافية بدون أجر، ونرى أن يكون هذا الموضوع اختيارى للعمال لمدة شهر.. شهر واحد كفاية والالتزام بتحديد ساعات العمل بسبع ساعات حسب القرارات..

...: واللى كان بياخد ساعة اضافية برضه يظل ياخذها.

عبد الناصر: آه.. مع ابقاء استمرار صرف الأجر الإضافى لجميع العمال، اللى كانوا بيشتغلوا ساعة زيادة بأجر إضافى.

صبرى: والأرباح كلها.

عبد الناصر: وبرضه يعنى عدم خصم أى نسبة من الأرباح المقررة للعمال والمحافضة على جميع المكاسب التى حصل عليها العمال والموظفين فى سنة ١٩٦١. وبعدين بنقرر برضه بندى الموظفين مكافأة كل سنة.

...: موجودة دى فى الميزانية؟

عبد الناصر: آه.

القيسونى: فى أوائل يوليه.

عبد الناصر: آه.. ويبصرف للموظفين فى أول يوليه العلاوة السنوية، المنحة هى السنة اللى فاتت كام؟

أصوات: ١٠ أيام.

القيسونى: خمسة مليون جنيه تقريبا.

سرى للغاية

عبد الناصر: ندى السنة دى كام؟

أصوات: ١٢ نفسها.

صبرى: أول سنة كانت ١٠ وبعدين ١٠ وبعدين...

عبد الناصر: نزود يوم أو يومين يعنى إحنا عايزين نصل لشهر.

أبو النور: كأنا يعنى ماعملناش حاجة.

صبرى: بس رأيى.. الحقيقة السنة دى بالنسبة للعمال كملنا الأوضاع.

القيسونى: يعنى مازودناش أرياح العمال.

عبد الناصر: العمال أحسن حاله من الموظفين.

صدقى: أقل عامل كان بياخد ١٥ يوم منحة، ماهو المنحة لما جينا أمانها فى المرتب.. يعنى إدينا لأقل واحد ١٥ يوم.

عبد الناصر: الاتجاه نزود.

صبرى: أبوه يافندم ١٥ يوم.

صدقى: أقل عامل خد ١٥ يوم يافندم.

استينو: ١٥ يوم بحد أقصى للموظفين ٢٥ جنيه.

أبو النور: هى حد أقصى زمان.. ثابت.

سرى للغاية

القيسونى: إنا ببقى إديناهم ٣ أيام زيادة وخفضنا الإذار ستة أيام! (ضحك)

عبد الناصر: أنا متهيألى كل ده تخفيف عن كاهل الموظفين.

أبو النور: آه.. ماشى.

عبد الناصر: على بقى عليه يوفر المليون جنيه دول. (ضحك)

صبرى: مش مشكل مليون جنيه فى السنة.

عبد الناصر: سهله تبقى؟

الشافعى: ماهو برضه جزء من الحاجات دى اللي قالها الرئيس.. التخفيضات الأخرى بتاع ٢٥٪ من بدل التمثيل.

عبد الناصر: آه.. تخفيض ٢٥٪ من بدل التمثيل وإيه تانى؟

إبراهيم: وعدم الجمع بين بدلات.

عبد الناصر: آه عدم الجمع بين البدلات.

أبو النور: فوق الـ ٥٠٠ أظن؟

عبد الناصر: فوق الـ ٥٠٠ جنيه.

القيسونى: وإلغاء بدل حضور الجلسات؟

أبو النور: للمعينين والمنتخبين.

سرى للغاية

أصوات: لا.. لا.. مش ماشية!

أبو النور: المعينين والمنتخبين.

عبد الناصر: المنتخبين بيبقى استفاد إيه؟

القيسونى: ما هم بياخدوا ماهيه برضه.

أبو النور: لأ.. بس ماهيه صغيرة يعنى منتخب عامل يعنى...

القيسونى: نخليها المعينين بس.

أصوات: تضايق الناس المعينين بس.

عبد الناصر: يعنى اللى بيدخل ويكافح علشان بيبقى عضو مجلس ادارة منتخب، بيطلع له بدل حضور فى الشهر يعنى مبلغ.. ماتستاهلش.

...: مافيش يافندم غير ٥ جنيه بس بدل حضور.

عبد الناصر: بلاش دى.. الحقيقة بلاش ماتستاهلش! تطلع تقول الكلام ده دلوقتى الساعة ١٠ بيلحقوا الجرائد.

القيسونى: إيدار يوم و ١٥ يوم منحه، دى يعنى بيبقى..

أصوات: للموظفين مش..

القيسونى: طيب ماهى مفهوم يعنى بالنسبة للموظفين إحنا زدنا المنحه ٣ أيام، وبعدين خفضنا الإيدار ٦ أيام.

سرى للغاية

...: طيب وماله.

القيسونى: يعنى يانلغى الإدخار.

...: لا.. لا.. كمبدأ عام.

القيسونى: ونخلى المنحه ١٢ يوم.

عبد الناصر: إحنا هدفنا نوصل السنة ١٣ شهر بالعملية دى. حاتفرق مليون جنيه مش كده؟

أصوات: مليون وربع.

القيسونى: آه.. مليون وربع.

عبد الناصر: متهيألى بالعملية دى، يبقى يعنى هم حايسبوا بالحساب اللى بيحسبه الدكتور القيسونى يلاقوا نفسهم فى العملية..

...: يلاقوا نفسهم مافيش حاجة.

عبد الناصر: طالعين بثلاث أيام!

أبو النور: ومدخريهم.. جت كويسه.

القيسونى: الـ ١٢ يوم.. هم كان عندهم شك فى حكاية المنحة، كان فيه كلام بيتقال إنهم حاياخدوا الـ ١٢ يوم.

عبد الناصر: آه.

القيسونى: دلوقتى ضمنوا ١٥ يوم وخفضنا الإدخار ماحققهمش.

سرى للغاية

عبد الناصر: أنا متهيألى بالكلام ده ببقى كل الموقف اتصلح خالص.

أبو النور: وموتنا كل اللى فات.

عبد الناصر: تعبئة.. والحقيقة على بيشرح موضوع الإدخار أوالدكتور عبد المنعم.

صبرى: لغاية ماأقوله الحقيقة فى البرلمان.

عبد الناصر: آه.. أو إشرحه للهيئة البرلمانية، هو الهيئة البرلمانية بعد بكرة؟

أصوات: يوم التلات.

عبد الناصر: ببقى بس شرح أو الدكتور عبد المنعم بيجهز ويتروحووا، ممكن هو يكون مجهز وبيقول.
يعنى إنت تقول in general وهو ممكن يقول in detail، وحايبقى جلسه علنيه مش كده؟

صبرى: ماعرفش.

أصوات: تبقى مقفلة.

صبرى: كانوا عايزينها مش علنية.

...: هو ممكن النشر فى الصحف؟

عبد الناصر: ممكن النشر، وممكن بترتب. الأرباح حاتبتدى الصرف إمتى؟ أرباح العمال؟

صدقى: أكتوبر؛ أصل السنة المالية بتخلص فى آخر يونيه.

عبد الناصر: آه.. الموظفين بس اللى ببيجوا فى أول يوليو.

سرى للغاية

القيسونى: حانفتح مجال الاختيار فى طريقة الإدخار ولا بس نركز على دفتر التوفير؟

...: آه.. دفتر التوفير أحسن.

عبد الناصر: والله يعنى لو نعمل دفتر السنة الجايه ممكن نزود يوم، السنة الجايه نعمل النص يوم يوم، ونخليها يعنى لما كل واحد حايشوف معاه دفتر وله حساب ويتاع.

محي الدين: دى من السهل تمشى.. ودفتر.

أبو النور: ماهو مش حايقدر يسحب يعنى زى دفتر التوفير.. بعد شوية.

القيسونى: كان فيه اقتراح تانى، إن مثلا تبقى شهادة استثمار برضه، يعنى بياخد ورقه معاه شهادة استثمار من البنك الأهلى أو المصرى.. موضح. يعنى ياخذ شهادة واحدة بدل ماياخذ دفتر، وكل سنة أو كل شهر نسجل فى الدفتر المبلغ اللي بيدخره بياخذ شهادة.. إدخر فى السنة مثلا جنيه ياخذ شهادة استثمار تستحق بعد خمس سنين بجنيه زائد الفائدة ٥٪، هنا الواحد مايرجعش للبنك تانى. فيه إقتراح تالت بوليصة تأمين أن ياخذ بوليصة تأمين ويعتبر المبلغ مدخر.

عبد الناصر: والله أنا شايف الدفتر أحسن.

أبو النور: الدفتر أحسن من كل ده.

القيسونى: دفتر وبيتردد على البنك، هى كانت بس الناحية الادارية إذا كانت لأنهم حاياخدوا ٢ مليون حساب جديد.

عبد الناصر: طيب كويس يعنى بنعمل وعى إن ناس تشيل فلوسها فى البنك، تخلوها البنك والبوسته؟

أصوات: أيوه.. آه.

سرى للغاية

القيسونى: البنك والبوسته إذا كانت إدار .

عبد الناصر: بس عايزه والله Plan يعنى.. ولو ان المبلغ صغير لكن عايزه Plan لتوعية الناس حتى علشان السنة الجايه بكل أجهزة الإعلام.

صدقى: اللى يتخصص يدون بالدفتر، مش كده؟ اللى الدفتر معاه يصرف يسددوا له فيه.

القيسونى: مرة واحدة فى السنة، يعنى تتخصص من الماهيه بتاعه كل شهر، وبعدين كل وزارة تلم الدفاتر بتوع الموظفين بتوعها وبعدين تبعتم للبنك المختص، يعنى نوزع الموظفين وتتضاف مرة واحدة، وبعدين الفوائد تتضاف السنة اللى بعدها.

عبد الناصر: حانشوف موقف التموين؟ بالذات نبتدى بموقف القمح.

استينو: موقف القمح لغاية دلوقتى مش مطمئن، على أساس إن كانت البعثة اللى سافرت الأرجنتين كان مفروض انهم يتعاقدوا على نصف مليون طن فى شهر مايو، وبيبتدى الشحن من يونيه بمعدل ١٠٠ ألف طن أو ١٢٥ ألف طن كل شهر؛ فلغاية دلوقتى المفاوضات فى الأرجنتين ماإنتهتش الى شئ! إحنا عندنا قمح يكفيننا - بما فيه اللى جاى لنا من المحصول المحلى - يمكن لغاية آخر يوليه أو لغاية الأسبوع الأول من أغسطس، لكن إحنا بنحب دائما على الأقل قبليها بأسبوعين يبقى عندنا قمح جديد وصل؛ علشان نقدر نوزعه على مناطق الاستهلاك.

اللى ملاحظينه السنة دى كمان ان كميات القمح اللى بترد لبنك التسليف أقل من السنة اللى فاتت، والسنة اللى فاتت كانت أقل كثير من السنة اللى قبليها. وده يمكن يكون سببه إن الناس بتحتفظ بالقمح بتاعها، على أساس ان كان طلع فى الجرائد ان مش حاناخذ قمح من أمريكا ويمكن يحصل نقص فى القمح؛ فالناس بتخزن القمح بتاعها، فمش عاوزين برضه نتكل كثير على القمح المحلى.

إحنا فى سبيل التعاقد دلوقتى على ١٠٠ ألف طن من استراليا، واتفقنا على كل حاجة بس برضه المراكب مش حاتقدر تيجى فى الميعاد اللى يلحقنا؛ اللى هو فى نصف

سرى للغاية

يوليه. وتعاقدنا على ٣٠ ألف طن من أمريكا عن طريق لبنان، برضه دول يمكن يتأخروا شوية أنا كنت سمعت ان فيه قمح فى اليونان.. فائض كبير فى اليونان، وكان قال لى واحد يونانى اسمه جون لابسيس وقال: ولو إن أمريكا يمكن يبقى فيه معارضه على أساس ان اليونان بتاخذ زيت وحبوب للعلف من أمريكا حسب قانون ٤٨٠، وفيه شوية حظر لبعض السلع، لكن إحنا كنا بناخذ قمح ودقيق من أمريكا وبنصدر أرز يعنى مش كل الحبوب.

عبد الناصر: وهم الحكومة هناك يقولوا - أنا قرأت برقية - إن ممكن العملية تمشى بين الحكومتين.

صبرى: بين الحكومتين آه.

استينو: وبعدين أنا لما جاء لى تلغراف من السيد السفير بين الحكومتين أنا بعثت له، قلت له: مافيش مانع. لكن النهارده جاء تلغرات تانى برضه منه مش واضح، لكن بيقول فيه برضه آثار تانى حكاية أمريكا، وبيقول: إنه بعث العينات بالطيارة تصل النهارده.. عينات القمح. وبعدين أنا كنت كلمت الدكتور لبيب شقير على أساس إن احنا نبعت محمد غانم يسافر بكره ويشوف الوضع إيه؛ علشان مش عايزين نمشى وقت طويل وراء العملية وبعدين مانقدرش ناخذ القمح. فإذا سافر محمد غانم بكره، بيقابل السفير وينشوف إذا كان وجود وسيط فى العملية يسهل الشراء نمشى.

اللى أنا أخشاه أنه يكون السيد السفير فاكر ان اليونان بتمشى زى ألمانيا الغربية؛ لأنه عاش فى ألمانيا الغربية كثير. أنا باعتقد بان اليونان يمكن وجود وسيط يمشى العملية أكثر من اتفاق مباشر بين الحكومتين. فلو سافر محمد غانم بكره وقدرنا ناخذ كمية؛ هم بيقولوا: ٣٠٠ ألف، سيد جلال كان هناك من أسبوعين وبيقول: عندهم ٦٠٠ ألف، والقمح بتاعهم حايقى أرخص لأن المسافة قريبة. لو جاء لى القمح ده، على طول بعد كده بنقدر يطلع القمح الفرنساوى فى أغسطس وبنقدر نشترى فى سبتمبر. والتقارير اللى جايه عن فرنسا إن المحصول كبير للغاية دلوقتى، والمساحة أكبر من السنة اللى فاتت.

مافيش بقى قمح قريب مننا؛ لأن إيطاليا المساحة أقل والمحصول المقدر أقل، وماعندهم فائض فيه. بقى الظاهرة العجيبة إن الصين وروسيا بيشتروا كميات ضخمة جدا اليومين دول، يعنى دخلوا مشتريين بكمية أظن ٤ مليون طن من كندا واشتروا حوالى ٣ مليون طن من الأرجنتين، غير الكميات السابقة اللى اشتروها من فرنسا ومن استراليا. وبيقال إن دى عمليات تخزين، يعنى ماهماش فى حاجة إليها. دخولهم السوق بكميات كبيرة فى الشراء، دى برضه حاتبقى فيها شوية صعوبة إن احنا نجد الأسعار الرخيصة اللى كان

سرى للغاية

يجب تكون موجودة؛ لأن فيه فائض كان كبير فى القمح . الولايات المتحدة عندها طبعاً فائض كبير، وهم يقولوا: إن احنا مستعدين نبيع بس نقدا يعنى وبالدولار .

تعاقدنا على كميات دقيق من إيطاليا حوالى ٩٠ ألف طن، بس مايقدروش يشحنوا غير ٢٠ ألف طن فى الشهر، وتعاقدنا على ١٥ ألف طن من أسبانيا - إيطاليا وأسبانيا - تقسيط على سنة. وإمبارح جاء لنا عرض من فرنسا على ٥٠ ألف طن، بس الشحن من أغسطس والتقسيط على سنة ونصف، وقبلنا العرض بتاعها. النهارده جاء عرض من ألمانيا الغربية ٥٠ ألف طن، بس عايزين التقسيط على سنة، لسه إحنا بنبحث الوضع ده. ولكن لما ناخذ من كل البلاد دى برضه يعنى يمكن نقدر نجمع حوالى ٤٠ ألف طن فى الشهر. إحنا احتياجنا الشهرية ١٢٥ ألف طن قمح و ٥٠ ألف طن دقيق، فإذا كان حاينقص الدقيق شوية طبعاً حانبقى نزود استهلاكنا من القمح.

يعنى الحقيقة موقف القمح للغاية دلوقتى لسه ماهواش واضح، ونرجو إن احنا نبت فيه بسرعة علشان مانفاجأش بنقص قمح كثير. كنت باتكلم مع الأخ عبد المحسن إمبارح.. هل إذا ماقدرناش ناخذ القمح اليونانى واتعطلنا، هل فيه طريقة نقدر نسحب شوية قمح من الريف؟ على أن فى المستقبل بعد قمح فرنسا مايطلع نرجع نمون الريف مرة تانية. هو كان له اقتراح إن احنا بندى يعنى تصريح للبنوك انها تدّى التجار فلوس علشان يشتروا قمح، وبعدين همه حايزنوه فى البنوك فى وقت الحاجة بنقدر نستولى عليه.

النهارده طبعاً معظم الفلاحين مايرضوش يوردوا لبنك التسليف؛ علشان مايدفعوش الديون اللى عليهم. وبرضه إذا كان هذا الاقتراح ممكن على ان التجار ياخذوا سلفيات ويشتروا قمح ويحطوه فى البنك؛ لأن كل تاجر بياخذ سلفية من البنك مفوض يرهن القمح ويسيبه فى البنك موجود. فإذا جينا وجدنا نفسنا ما عندناش قمح نقدر نحط إيدنا، لو ما عملناش كده حايبقى صعب الحصول على القمح؛ لأنه حايبقى موزع على عدد كبير جداً من المنتجين ومن التجار خارج البنوك، مانقدرش نلمه فى الوقت المناسب.. ده بخصوص القمح والدقيق.

أبو النور: إذا سمحت لى سيادتك بالنسبة للقمح الداخلى هو متهيألى إن لازم نمشى فى طريقين مع

بعض، هو عدم دخول القمح لبنك التسليف للغاية دلوقتى راجع لعدة حالات:

إن الناس تأخروا شوية فى دراس القمح للغاية دلوقتى؛ لأن احنا عملنا stress بشوية على زراعة الذرة الصيفى، فالمجهود كله راح لزراعة الذرة الصيفى وماكانش فيه وقت علشان يدرسوا القمح وشالوا القمح بسرعة علشان يلحقوا يزرعوا بداله الذرة. الناحية التانية.. بيشتروا الرز فى نفس الوقت وبياخذوا مجهود فى هذه النقطة.

سرى للغاية

باقى اللى آخر بنك التسليف على أن يدخله قمح لغاية دلوقتى، جزء آخر طبعاً اللى قاله الدكتور رمزى استينو فيما يختص بهروب الناس من انهم يدفعوا مستحقات بنك التسليف ويهربوا القمح. أنا جامع بتوع بنك التسليف كلهم بكره، وأنا برضه بأرجو الدكتور القيسونى يساعد معانا فيما يختص بالصيارف؛ على أننا لابد ناخذ مستحقاتنا اللى على القمح من الناس، طالما إن احنا يسرنا لهم يعنى إنهم بيدفعوا الربع ويدفعوا ما عليهم. إذاً لابد أن يدفعوا وإلا حاندخل فى الدوامة، ومحدددين إن احنا بناخذ من القمح ما يخص القمح بس مابناخدش عليه أى متأخرات أخرى لأى محصول آخر.

فعلى هذا الضوء إحنا قلنا بناخذ من الناس ان شاء الله عينى، يعنى قمح بنك التسليف يسدد ويأخذ قمح ويدخل عنده قمح مستحقات الناس. ولا بد أن نصمم على هذا، وإحنا جامعين بتوع بنك التسليف بكره لهذا السبب، وبرضه نخلى الصيارف يصمموا على هذا الموضوع. وهم كل بتوع بنك التسليف بيقولوا: القمح بتاع الناس لسه فى الأجران ماعملوش فيه حاجة، فلو مشينا على أساس إن احنا لازم ناخذ مستحقاتنا من القمح عينا لبنك التسليف، وبعدين سلفنا التجار على أساس انهم حايهونوا القمح فى البنوك؛ يبقى ممكن جزء كبير جدا من القمح يبقى متوفر فى الشون، فى أى وقت نقدر ناخذ منه اللى احنا عايزينه، يسد لنا الثغرة فى الفترة الأولى على ما ننهى الاتفاقيات مع الدول الأخرى.

معى الدين: هو المعلومات برضه اللى جايه من الريف تؤيد الكلام اللى بيقله الدكتور استينو من الناحية المعنوية والنفسية الناس حاسة بأنه فيه Shortage فى القمح، وإن فيه عدد كبير من الفلاحين بيحتفظ بالقمح وحايبيعه بالكيله، وبعدين حايحصل على سعر أكثر من حكاية الأربعة جنيهه اللى انتو بتدوهم له .

موضوع السعر.. موضوع برضه نضيفه على العوامل الأخرى.. موضوع مهم جدا، إنتوا تملى بتشتروا بأربعة جنيهه هو بيقدر يبيعه بخمسة وستة بالقطاعى.

عبد الناصر: أنا رأى إن إذا أخذنا القمح من الريف حانضطر إنهم يعنى.. حتى هو حل ماهواش حل. أنا رأى نرتب على عملية اليونان، ولإزم نجيب من اليونان أكبر كمية من القمح، يعنى إذا قدرنا نجيب نص مليون طن نجيب نص مليون.

استينو: هم عندهم ٦٠٠ ألف طن وقمح رخيص يعنى.

سرى للغاية

عبد الناصر: عملية لازم نركز عليها.. نتعاقد على العملية ونمشى، ويرضه باقول فى عملية القمح: إذا إضطرينا ندفع ده قبله لازم ندفع ده، ولازم نقرر النهارده ولازم يكون عندنا احتياطى من القمح؛ لأن طبعا اللى بيشتغلوا علينا بيشتغلوا على.. وأنا فى رأى إن الأرجنتين حصل عليهم ضغط مايبيعولناش!

...: قطعاً.

عبد الناصر: يعنى تصورى أن الأرجنتين حصل ضغط على أساس مايبيعولناش، وعلى هذا الأساس نطلع إن شاء الله ٢٠ مليون جنيه ذهب، ماإحنا الذهب حانعمل به إيه؟ ماهو يعنى حكاية الغطاء دى.. أنا رأى إنها الذهب لما نقابل به ظرف كهذا نشترى قمح، وفى خلال السنة حاقسط على سنة أنا حادفعه بأدفع cash حادفع؛ فاللى عندنا إحنا النهارده ٦٠ مليون جنيه ذهب!؟

القيسونى: بسعر الصرف الجديد.

عبد الناصر: بسعر الصرف الجديد بأطلع ٢٠ مليون جنيه وأشترى قمح دلوقتى على طول، وبيجيبو لى أد إيه الـ ٢٠ مليون؟

استينو: هو إحنا نقدر إذا كان من أوروبا حوالى ٢٢ جنيه الطن، من كندا وأمريكا وأستراليا حوالى ٢٥ جنيه للطن، يعنى قريب قوى من مليون، حوالى ٨٠٠,٠٠٠ الى ١,٠٠٠,٠٠٠ طن من ٨٠٠ ألف طن الى مليون طن.

عبد الناصر: نطلع ٢٠ مليون جنيه للقمح ونشترى قمح Cash بالتقسيط على ٦ شهور على سنة، مايبهمنيش ولو مع الأرجنتين، ولازم أجيب نص مليون طن قمح قبل آخر أغسطس.

القيسونى: إحنا عندنا المبالغ اللى كنا مجمدينها من النقد الحر، يعنى عندنا النهارده يمكن ٩ مليون جنيه، مايفيش داعى اننا نبتدى بعملية الذهب يمكن.

سرى للغاية

عبد الناصر: يعنى باقول بصرف على أساس إن ماعدكش النهارده بأطلع ٢٠ مليون جنيه للقمح وأجيب قمح، ولازم أتعاقد فى خلال أسبوع. وبهذا حتى التانيين يحسوا ان أنا مش حأتزق خلاص يعنى؛ لأن وكالات الأنباء Following عملية الأرجنتين كل يوم، أما مايبجيش حاجة من طعيمة بيجيلى من اليوناييتدبرس.. حاجة غريبة يعنى (ضحك) والله!

صبرى: ٢٠ مليون كثير، أعتقد أن ١٠ مليون كفاية بنص مليون طن.

أبو النور: بنصرف العشرة مليون اللي همه عند الدكتور القيسونى دلوقتى متوفرين، ونمشى فى العملية بتاعة الـ..

عبد الناصر: أصل على قلبه يعنى مش..

أبو النور: لأ نمشى فى نفس الموضوع.

عبد الناصر: يعنى أنا مقدر العملية إن الأمريكان إذا حايدونا حايدونا بعد ستة أشهر، وفى رأى إن الأمريكان هم عاملين خطتهم على أساس يدونا سنة عقاب! إذا حايدونا اتفاقية يعنى حايدونا بعد ستة أشهر أو بعد سنة. المهم إن مايجيش يوم تقول لى البلد مافيهاش قمح! يعنى إفرض يوم البلد مافيهاش قمح، طيب حانعمل إيه؟!

القيسونى: هو فى تقدير مصطفى كامل إن الأمريكان..

عبد الناصر: أنا مايبهمنى.. مصطفى كامل هجاص!

... لا هو العملية..

القيسونى: أصبحت فى ظرف ٤٨ ساعة.

عبد الناصر: أنا شفت مكالمته معاك فيعنى.. (ضحك)

سرى للغاية

...: وزارة الخارجية كلها مش كده والا إيه؟

...: على حد فى الخارجية؟

القيسونى: آه.. إمبراح بيقول إن (ضحك) التلغرافات كانت بتعرض عليه بالنص الأسمى، هو يمكن أنا رديت عليه رد ماكانش متوقعه، فبيقول يعنى تطلب من الخارجية النص الأسمى بتاع البرقيات كما هو أرسلها.

عبد الناصر: يعنى هو مصطفى كامل كلامه فيه كثير من الكلام عن نفسه وان أنا عملت، ويعنى أنا بأقرأ أسيب نص البرقية وماأقرأهاش وأقرأ الربع الأخرانى! (ضحك) بتطلع معظم البرقية بيتكلم على نفسه.. أوضحت وبينت وشرحت وعملت!

القيسونى: والمثابرة.

عبد الناصر: العملية عملية سياسية، وهى الزنقة الوحيدة اللى ممكن نتمسك فيها هى عملية القمح، بعدين اليوغوسلاف عندهم حوالى ٩٠٠,٠٠٠ طن ذرة هه.

صبرى: بس تفاوضنا معاهم ماجابش نتيجة برضه.

عبد الناصر: هم بيقولوا مستعدين ياخدوا كُسب - الجدع بتاعهم ده - يشتروا كُسب ويدونا.

أبو النور: هو أنا تقديرى للذرة إن احنا مش عايزين أكثر من ٣٠٠ ألف طن بالكثير يعنى.

عبد الناصر: يبقى القمح.. القمح.

أبو النور: الذرة مش مشكل أساسى.

استينو: لو كان فيه ذره ناخدها ونخلط ذره مع القمح؛ لإن احنا لغاية ٢٥٪ نقدر نخلط وبيطلع رغيف كويس جدا، لو كان فيه فى يوغوسلافيا ذره ناخذ ذره.

سرى للغاية

عبد الناصر: عندهم هم.. تيتو هو نفسه اللي قال.

استينو: ناخذ ذره وتتفعنا فى عمل الرغيف فى المدن ٢٥٪ ذره و ٧٥٪ قمح.

عبد الناصر: هو دلوقتى الواحد خايف من الآتى.. أنا خايف إن الأمريكان كل بلد نروح نشترى منها يخلقوا لنا عقبة، وجايز نترنق مانشتريش إلا منهم، وهم يهتمم إن احنا نشترى منهم بالدولارات Cash. وبعدين حانشرى منهم مش حايدونا أكثر من ٦ شهور، وبعدين عملية الضمان والكلام ده مش حايدونا! وأنا رأى العملية Political كلها؛ يعنى هم عايزين يؤدبونا الموضوع النهارده لازم نتعاقد فى خلال أسبوع على قمح، وياقول نتعاقد بـ ٢٠ مليون جنيه - مش بعشرة - على قمح.

معى الدين: علشان نفسد الخطة من دلوقتى.

عبد الناصر: إذاً يعنى إحنا عايزين السنة دى كام؟

استينو: مليون ونص طن.

عبد الناصر: فأنا حادفع حادفع.. بمعنى إيه؟ حادفع لو على التقسيط فى السنة حادفع، ماحدش حايدنى أكثر من...

أبو النور: إحنا عايزين بـ ٥٠ مليون.

عبد الناصر: حادفع.. ليه أدور أقول: إدونى ستة أشهر وإدونى سنة، وده مش راضى وده مش فاهم إيه وأدونى ١٨ شهر! وعمالين يعقدوا! وأبتدى أقول ٢٠ مليون جنيه عملة صعبة بأجيب بها قمح. عندك ١٠ مليون جنيه تطلع ١٠ مليون ذهب، ومن بكره نتعاقد مع الأرجنتين.. مع ده مع ده، ولازم يعنى فى خلال هذا الأسبوع يكون عندنا نص مليون طن قمح، ويكون عندنا جدول بوصول القمح. أنا مش مع على فى حكاية العشرة مليون؛ لأن أنا متصور ان فيه خطة بحيث إن احنا نترنق ونبيجى يوم مانلاقيش.

سرى للغاية

ويعدين القمح بتاعنا.. معنى إن أنا حاجييه من الريف إن أنا حأرجع تانى
اشتريه بفلوس، وإذا كان فيه نقص ذره معناه إن حايزيد استهلاك القمح؛ فالعملية بهذا الشكل
هى عملية صورية.

أبو النور: هو أنا مش قصدى أسحبه من الريف أنا قصدى أحطه فى الشون فى الريف، بس يبقى
تحت إيدى فى أى وقت أقدر ألجأ إليه.

عبد الناصر: لكن قصدى مش حايجصل.

أبو النور: لأ.. مش حايجصل لأ.

عبد الناصر: إن احنا اللي بناخده من قمحنا للاستهلاك مدة التعويض؟

...: شهر.

عبد الناصر: شهر.. طيب أسوأ يعنى!

صبرى: السنة دى حانكشفت.

عبد الناصر: فعلى هذا الأساس لازم ناخذ حاجة قاطعة ونخلص منها.

القيسونى: يافندم أنا مسلم بضرورة إننا نجيب كل القمح اللي لازم لنا علشان الاستهلاك المحلى، بس
إذا كنا حانستخدم الذهب بتاعنا، فدى حاجة تحت تصرفنا يعنى نقدر نستخدمها فى أى
وقت، فهل توافق سيادتك على أن يكون عندنا برنامج ظان يكون فيه مخزون من القمح مثلا
باستمرار لمدة ٣ شهور، ويعدين كل مانستهلك من المحصول..

عبد الناصر: هو المهم من هنا لأغسطس لازم يكون عندى، أتعاقد على قمح من هنا لأغسطس لغاية
مايطلع القمح الفرنساوى لغاية سبتمبر.

سرى للغاية

...: غطينا المرحلة دى.

عبد الناصر: بعد كده فرنسا حايدوك لأن الأمريكان مش حايقدرُوا يقنعُوا الفرنساويين، وبعدين اللى أنا خايفه إن الأمريكان يدوسوا على اليونان مايدوناش، مش سهل يعنى حتى بصرف النظر عن القانون ٤٨٠؛ فيبقى لازم نجيب من الأرجنتين أو من استراليا.

استينو: ودى بقى مش حاتوصل فى الميعاد فى الاثنين، وعلى ذلك بنرجو يبقى القمح المحلى لأن الأرجنتين وكندا عايزه لها شهر ونص.

عبد الناصر: اللى أنا متصوره الأمريكان فى محاولتهم للعملية السياسية حايروحو على اليونان، حتى لو اليونان تقدر تبيع بيخلقوا لنا مشكلة ومايبعوش! طيب نعمل إيه واحنا ما عندناش قمح؟! هو ده ال Problem اللى أنا شايفه الحقيقة.

القيسونى: لأ.. ما إحنا نكوّن مخزون بتاع ٣ شهور، طالما ان عندنا الذهب نقدر نجيب من أى دولة يعنى بعد كده. هو اللى بيصعب مع الأرجنتين دلوقتى أو مع الدول الثانية، اننا بنطلب أجل ١٨ شهر وينطلب أجل ١٢ شهر، على إن إذا كنا بندفع Cash ماأظنش ان الحكومة الأمريكية تقدر تضغط عليها.

عبد الناصر: لأ.. ما هو لذلك أنا باقول لك: لازم ندفع Cash يعنى العملية النهارده ضايعة، يعنى اللى أنا قلت عليه إن احنا عمالين نتفاوض على ١٨ شهر و ١٢ شهر، وفى رأى حاندخل فى Gap مش حايجصل فيها حاجة.

استينو: الأرجنتين عارضه من الأول ٦ شهور، يعنى إذا كنا أخذناها كان زمان القمح إبتداً يصل.

عبد الناصر: يعنى بأوافق على ٦ شهور مع الأرجنتين وأمشى، لكن عملية مد العملية بيدخلنا فى...

إبراهيم: وبعدين هى دى نصف الكمية، يعنى أقل من نصف الكمية كمان بالعشرين مليون، والباقى بنتعاقد عليه بقى أدام ما فيهاش حاجة.

سرى للغاية

عبد الناصر: دلوقتى إذا كان مافيش قمع حانعمل إيه؟

القيسونى: لأ.. لازم يكون عندنا مخزون أنا باقول مخزون ثلاث أشهر، ليه؟ للاحتتمالات. يعنى جايز إننا نقدر نجيب برضه من أمريكا، وجايز لما يشوفوا اننا إبتدينا نستخدم الذهب بتاعنا.

عبد الناصر: طيب إحنا عندنا دلوقتى؟

استينو: عندنا شهر ونص.

عبد الناصر: آه.. شهر ونص.

القيسونى: عندنا عقود بـ ١٦٠ ألف طن دقيق لسه جايه.

استينو: حاييجوا فى الميعاد المناسب.

القيسونى: إذا تم برضه جميع البواخر بشأن الكمية المتبقية المنتظرة الشحن فى خلال يونيه سنة ٦٥.

استينو: كام صنف؟

استينو: ده دقيق أسباني ٣٥ ألف طن، دقيق فرنساوى نفس الحكاية خلال يوليه ٢٣ ألف طن.. وهكذا وبعدين دقيق.

عبد الناصر: كل ده أصلا أنا شايفه.

...: إحنا عايزين ٢ مليون تقريبا.

عبد الناصر: أنا غير مطمئن لكل هذا الكلام.

سرى للغاية

.... : عايزين ٢ مليون طن تقريبا.

عبد الناصر: حاتدفع على سنة حاتدفع على ٦ شهور، طيب.. ماهو إنت حاتدفع، يعنى ليه النهارده نقصر ونحط نفسنا فى موقف صعب وفى كل الحالات حادفع ستة أشهر! بأفقل الـ ٦ أشهر وأمشى وأتعاقد بكره، بأبعث تليغراف لطعيمه، باقول له: إقبل ٦ شهور واتعاقد بكره، أبعث اليونان وباقول بيدونى على ٦ شهور وبأتعاقد بكره.

القيسونى: كام الكمية يعنى فى حدود؟

استينو: اليونان.. لو أخذنا نص مليون طن من عندهم يبقى كويس جدا؛ لأن حايبقى قمح كويس وناشف لأنه محصول قديم.

صبرى: وسريع.

طراف: حايوصل بسرعة فى أسبوع.

القيسونى: بعشرة مليون جنيه.

استينو: بس مش حاياخدوه Cash كله، يعنى هم مؤكد حايرضوا على سنة.

القيسونى: يعنى ١٠ مليون جنيه ده ٣٠ مليون جنيه!

استينو: لا.. لا.

القيسونى: ٢٥ جنيه استرلىنى.

استينو: ده علشان C/F من استراليا، لكن اليونان مؤكد حايوصل هنا يمكن بـ ٢٣، ٢٤، ٢٣.

القيسونى: مصرى؟

سرى للغاية

استينو: لآ استرليني.

القيسونى: ٢٣ يعنى ٣٠ جنيه مصرى.

استينو: آه.

...: ٣٠ هو بثلاثين.

استينو: ٣٠ مصرى.

عبد الناصر: ١٥ مليون.. النص مليون بـ١٥ مليون.

القيسونى: ١٥ مليون جنيه.

عبد الناصر: على ٦ شهور مش على أقصى حاجة؛ حاتبقى على ٦ شهور.

أبو النور: طيب ماهمه الستة أشهر.

القيسونى: إننا مانرتبطش على المليون طن اللى جم النهارده؟

عبد الناصر: لا.. لأ.. أنا باقول: عايز لغاية سبتمبر يعنى عايز فى سبتمبر يكون عندى احتياطى ولشهرين، وبعدين فى سبتمبر أقرر أتعاقد مع فرنسا. لكن تيجى لى مثلا تقول لى ان عندى Gap خمسة أيام إن ماعنديش قمح! طيب أعمل إيه أنا؟ بيبقى خلاص نفذنا خطة أمريكا!

استينو: وبعدين يافندم لما بنشترى فى الميعاد المناسب بنشترى رخيص، يعنى السنة اللى فاتت فرنسا كانت عارضه بـ٥٦ دولار فى أول الموسم، إشترينا بـ ٦٨, ١٢ دولار فى الطن زيادة! فلما نشترى فى الوقت المناسب.. فى وقت المحصول مانكونش محتاجين بناخد بناقص.

سرى للغاية

عبد الناصر: وبعدين أنا اللي أنا متصوره برضه إن عملية اليونان لو خدنا نقدا تمشى، ونحط الخط ده فى حسابنا لأن الأمريكان Very influential يعنى حتى مع كده عايزين نعمل عملية اليونان.

استينو: عايزين أسبوع واحد على الأكثر.. يعنى عايزين مع اليونان يبقى أسبوع واحد، ولازم نشترى فيها تانى.

القيسونى: يعنى ماأطنش؛ لأن هو مش قمح حكومى فى اليونان يعنى ماهواش قمح حكومى.

عبد الناصر: طيب ماهى الحكومة بتدى تصريح بال.. مافيش داعى.

القيسونى: أما إذا كنا حاندفع بالذهب ماتقدرش.. مافيش حكومة تقدر تمنع يعنى التصدير.

أصوات: تقدر تمنع إذا كان عليها ضغط من أمريكا.

عبد الناصر: لأ.. إذا كان حايقولولهم حاجة، يعنى أنا فى رأى إن الخطة إن احنا نتزق بحيث إن احنا..

أبو النور: هو زى سيادتك ماقلت لازم نجيب بنص مليون طن على الأقل Cash فوراً نتعاقد عليها، والباقى نشتغل على أساس إن احنا نجيبه بالتسهيلات.

عبد الناصر: يعنى هو الـCash يعنى ٦ شهور أولى.. لو أطلبه Cash يعنى ٦ شهور.. مش كده؟! يعنى إيه.. هو فى أى بلد مستعده تديك ٦ شهور.

استينو: بياخدوا ٢٥٪ مقدم والباقى على ٦ شهور.

عبد الناصر: آه.. يعنى بهذا.

أبو النور: طبعا كل شحنه بتتورد بتاخذ فلوسها.

سرى للغاية

عبد الناصر: يعنى بادی Priority لهذا الموضوع، كمان بأبين للناس التانيين إن يعنى خطتهم انهزمت!

أبو النور: إن أنا مصمم.

عبد الناصر: وعملية الـ ٣٧ مليون علشان المؤتمر الآسيوى الإفريقى.

أبو النور: آه.. هو أساسا..

عبد الناصر: أساسا علشان المؤتمر الآسيوى الإفريقى وهمه كلامهم كده فى السفارة إن العملية دى علشان المؤتمر الآسيوى الإفريقى أساسا.

القيسونى: هو المفروض يروحوا بكره.

عبد الناصر: على إيه؟

القيسونى: على ٣٧.

عبد الناصر: لأ خلاص.. هم حايدوا ٣٧ بس علشان المؤتمر الآسيوى الإفريقى بس مش لتغيير فى السياسة، يعنى السبب كلام السفير للناس إن علشان المؤتمر الآسيوى الإفريقى.. وإن العملية دى معموله علشان المؤتمر الآسيوى الإفريقى.

استينو: حايدوها لنا دى خلاص؟ يدونا ٣٧ مليون؟

عبد الناصر: آه.

استينو: ماهى دى تنفعنا على طول؛ لإن احنا لينا عندهم دلوقتى ٢٢٠ ألف طن دقيق و ٩٠٠ ألف طن قمح، فأنا حا حول جزء من الدقيق الى قمح ونقدر.

سرى للغاية

عبد الناصر: هو ممكن يدريك وبعدين يقعد يعطل فى تصاريح الشراء مش كده؟

إبراهيم: والاضراب ومش اضراب.

القيسونى: والسفير قال ان فيه احتمال إضراب.. إضراب موانى.

عبد الناصر: وأنا رأيى ان موضوع القمح Very critical، وإن احنا مجابهين فيه بعملية.. يعنى هم يقولوا على صبرى شيوعى! (ضحك) وأنا قلت والله لنوفيكوف^(١) لما كان عندى على أساس ان موقف القمح وإذا يعنى مايقدروش يدونا سلفة ٣٠٠ ألف طن، قلت له: يدونا سلفة ٣٠٠ ألف طن لأن الوضع بالشكل ده وينردها لهم يعنى.

القيسونى: أو إذا كنا حانشترى وحاندفع نقدا أو ذهباً أو عملات فضة يعنى نقدر نشترى عن طريقهم، يعنى الأمريكان إذا عملوا لنا أى صعوبة فى أى دولة مانبانش إحنا فى الصورة، يعنى نقدر نشترى عن طريق روسيا أو عن طريق أى دولة تانية أو سويسرا.

...: يعنى نص مليون تقدر تشتريهم قوى يعنى وتدفع Cash .

القيسونى: يعنى طالما ان النقد فى إيدنا نقدر نعمل طرق مختلفة، بحيث إننا نضمن وصول الكمية اللى احنا عايزينها.

عبد الناصر: آه.. هو ده اللى مطلوب، يعنى هو اللى أنا مش عايزه نقعد نقول لأ ١٨ شهر و ١٢ شهر وماإحناش حاسين بعملية الوقت.

صبرى: هيه صفقة استراليا فى سبتمبر؟

استينو: لسه مالفوش مراكب علشان يربطوها.

(١) أجناتى نوفيكوف، نائب رئيس وزراء الاتحاد السوفيتى لشئون القوى الكهربائية.

سرى للغاية

عبد الناصر: يعنى هو إحنا لو جبنا عملية اليونان نبقى خلاص خرجنا من...

صدقى: هو الروس لو حبوا يساعدونا - أنا قلت لنوفيكوف الكلام ده - يعنى إذا ما عندهم قمح يدونا حاجات من السلع اللي بنضطر نجيبها بالعملة الصعبة، وبالتالي نقدر إحنا نشترى بالعملة الصعبة قمح. كوته معينة مش راضيين يزودوها.. البترول، هم وافقوا على ٣٠٠ ألف طن زيادة السنة دى بترول عن اللي كانوا موافقين عليه، كنا طلبنا يعنى وقالوا: إنه حايدرس الستة اللي إديناها له علشان إذا كان ممكن يدونا.

عبد الناصر: هنا أنا قلت له إدونا قمح وممكن نزود لكم فى الأرز.. يعنى ده نمره "١" ، وهم طلبوا منا الحقيقة السنة اللي فاتت أرز زيادة وإديناهم.

أبو النور: مزودين فى القطن.

القيسونى: أصل الأرز السنة دى صعب يعنى.

عبد الناصر: أو يدونا سلفة مايقاش بيع يعنى، يدونا سلفة وتترد.

استينو: بس أنا كنت طلبت سلفة من السيد السفير بتاعنا ورفضوا يدها له برضه.. كنا إترزقنا فى وقت وكلمته مارضيوش.

عبد الناصر: لا.. هو احتمال طبعا إنهم يدونا صعب لأن أنا طلبت قبل كده؛ ولذلك أنا طلبت من شهرين وقالوا يعنى: إنهم هم بيشتروا قمح ووضعهم سئ؛ فليس أمامنا إلا الكلام اللي أنا باقوله.

استينو: أنا كنت حتى قلت للدكتور المغربى.. قلت له: لو ييجى الأسبوع الأول من يونيه وماتكونوش انفتقوا أشتري ان شاء الله نقدا؛ لإن احنا حانبقى فى موقف هو عارفه، ومع ذلك ما عملوش حاجة!

سرى للغاية

فبرضه زى سيادتك مابتقول لازم فيه ضغط فى الأرجنتين؛ لأن أنا قلت له يعنى: يمشوا.. تفاوضوا زى ما انتم عايزين، ييجى الأسبوع الأول من يونيه وماعرفتوش تشتروا قمح بالتقسيط تشتري Cash تشتري بأى طريقة؛ لأن حانبقى فى محنة! ومع ذلك ماجاش منهم أبدا أى...

عبد الناصر: ده عندهم ١٠ مليون طن زيادة.

استينو: هو فاضل دلوقتى عندهم يعنى لسه عندهم قمح كثير.

عبد الناصر: الأرجنتين surplus ١٠ مليون.

استينو: ١٠ مليون.

عبد الناصر: فهو إحنا يعنى لازم نعرف يوم بيوم إيه الموضوع، تبعت لى يوم بيوم يا دكتور استينو.

استينو: حاضر.

عبد الناصر: لأن الموضوع لا يحتمل الحقيقة إن احنا ناخده.. وكمبدأ إن احنا مستعدين تشتري Cash ومستعدين تشتري بالذهب، بحيث لا يمكن إن احنا فى هذا ناخذ الموضوع easy يعنى!

صدقى: بالنسبة للأمريكان، أنا كنت بلغت الأخ على كان مولين قال من حوالى ١٠ أيام إحنا حكاية الـ ٣٧ مليون دولار حاتمشى، وإنهم فى سبتمبر أو أكتوبر حايمشوا سنة.. يعنى إنه مش بقى ٣ سنين يعنى مش قبل سبتمبر أو أكتوبر يعنى.

عبد الناصر: مولين اتقل!

صدقى: آه.. لكن ده قبل نقله.

سرى للغاية

.... هم طالبين بالنقد مدته ٦ شهور كان.

عبد الناصر: آه يعنى هو السفير اللى هنا بيقول إن يعنى فى الفترة بتاع ٦ شهور ممكن توقع اتفاقية وبتاع ومش فاهم إيه، لكن كلام الواحد بياخده برضه بتحفظ.

القيسونى: هو السفير باين انه عايز يعمل حاجة.

عبد الناصر: آه لأ هو باين ان الموضوع برضه فى الكونجرس سيئ، بدليل إنهم نفوا إمبارح إنهم حايدونا؛ لأن للغاية يوم الاثنين العملية راجعه تانى لمجلس النواب والوضع فى الكونجرس إتزنق كلية خالص، حتى عملية الـ٣٧ مليون اللى قالوا لنا إنهم حايدوها لنا إمبارح نفوا إنهم حايدوها لنا.

استينو: أيوه كتبوا فى الأهرام كده تلغراف كبير.

عبد الناصر: لأ.. ده نفى المتحدث الرسمى إنه حايدوها لنا!

القيسونى: جت فى وقت المناقشة فى الكونجرس.

معى الدين: اللى متقدم بالقانون بيقول إن من ضمن أهدافه إنه يحجز الـ ٣٧ مليون جنيه.

استينو: بالضبط.

معى الدين: أنا قرأتها فى الأهرام.

أبو النور: هى معمولة على هذا الأساس.

القيسونى: ماهو كان فيه اقتراحين؛ واحد بتاع السناتور هاريس.. إنه يدى تفويض للرئيس جونسون لاعطاء الجمهورية العربية وعد بالاعطاء. وبعدين التانى بتاع دروندنج اللى هو صهيونى خالص.. إنه مايدش خالص. فالحكومة شجعت الاقتراح بتاع هاريس قوى؛ إنه يمنع عن الجمهورية العربية ويمنع عن أندونيسيا، ولكن يعطى للرئيس جونسون حق التفاوض. يعنى هو كان كلام مصطفى كامل بالتليفون خصيصا علشان توضيح النقطة دى إنه بالرغم من

سرى للغاية

القرار ده فات من الكونجرس إلا إنه بيعطى للرئيس جونسون سلطة إنه يدينا، وإن التصويت النهائى حايتم بكره - يعنى يوم الاثنين - وحايبان بكره أو حايبان بالضبط بعد يومين ثلاثة إن إذا كنا الـ ٣٧ مليون حاتمشى وحاتمشى إمتة.

استينو: ده لو مامشيتش الـ ٣٧ مليون حاينقص عندنا الزيت ماعدناش زيت يقضى لغاية مالمحصول الجديد يطلع؛ لإن احنا لينا عندهم ٢٢ ألف طن اتفاقية.

عبد الناصر: لأ.. هم حايمشوا الـ ٣٧ يعنى هو الكلام على الـ ٣٧ وقبل اجتماع المؤتمر الآسيوى حايمشوا العملية، لكن عملية الـ ٣٧ علشان الاجتماع الآسيوى الإفريقى.

القيسونى: بس هو اللى أنا كلمت حاتم عنه برضه.. الخبر اللى طلع من هنا من القاهرة من اليوناييتدبرس فى وسط المناقشة هناك فى الكونجرس؛ عن إن الـ ٣٧ الرئيس جونسون يعنى وافق عليها.

عبد الناصر: طبيب ماهو جانى الحقيقة.

حاتم: مأنأ سألت.

عبد الناصر: ماهو قطعاً من السفارة.

حاتم: هو إحنا منسوب لمصدر مصرى الحقيقة، أنا جيت بتاع الـ UP النهارده لقيته ماطلعش، يعنى جميع البرقيات - سيادتك عارف إحنا بنراقبها وهى خارجة - مالقيتش ولا برقيه طالعه من الـ UP؛ فدليل انه طالع من السفارة.. واحد فى السفارة!

القيسونى: يبقى طالع من هناك بقى.. يعنى كون هناك هم نشره من غير مايكون طالع من هنا.

حاتم: يجوز هناك لأن مافيش فى البرقيات خالص، حتى الـ UP جه الراجل قال لى: أنا ماطلعش الكلام ده!

سرى للغاية

عبد الناصر: نكمل التموين الأسبوع القادم؟ ما فيش حاجة يا على؟

صبرى: لا

عبد الناصر: جايز الدكتور القيسونى معلق فى حكاية الفلوس! (ضحك)